

Waannisa Xaafeez Yesuus Kiristtoosa Wonggile Gelo

Waannisa Yesuusa, «As maaqqii as gancce bentteez Xooss Qaala» yeegii eriseeza. Yha Wonggilay xaafintteezay, eza nababiza asay Yesuusa as ashshizaya maaqqii ye7oda ginttintteez Xooss Na7a maaqqizana ammanod garkkennee eza ammanizitayis medhina de7o yezana untii erodgarkke (20:31).

Wonggilayis Tiina kifilay medhina Xoossa qaalaynnee Yesuusa petto maaqqeezana odii maaqqii, Yesuusa ashshizaya maaqqii ye7od ginttintteez Xooss Na7a maaqqeezana beeziza duma duma mallitayir fallisii beeziza. Xaafay, Yesuus Kiristtoosa fa ubbas tuma Xooss Na7annee Xooss adayir petto maaqqizana (1:1) afa qoncce odeeza. Yesuusa fa ubbas ta Afraamepp tiin yeza (8:58) yeegeeza. Wurssithal Toomaasa, «Ta Godayyo, ta Xoossayo» yeegii xeegeeza (20:28). Yeypp kaallii ma yha mallitaypp bentteez aafa odiz taarikkitay kaalliza. Yha kifilay pettii pettii asay Yesuusa ammanii eza kaallizita maaqqeezana odiza; ma yhankkitay ezar wayizii eqintteezaakkonnee wayizii ammanaam ixxeezako odiza. Shemppo 13-17 hellodayis Yesuusa aykintteez omath ezisi, e tamaritayir ab garkk mino dabbotithi yezako, ma wonttitha gallas sotinttodaypp tiina giigintto qaalannee minthatho qaala untisi odeezay

fallisii beeziza. Wurissithi shemppitay Yesuusa aykkintteez baggannee pirddas shiiqeez baz, E sotintteezannee e denddo, yey garkkekka denddaypp guye fa tamaaritayis E bentteez benttitha odiza.

Waannisa Wonggilay aykkeeze qofita

Gelo 1:1-18

Xamaaqiza Waannisannee Yesuusa tiina taamarita 1:19-51

Yesuusa ooso aykkeeza 2:1–12:50

Wurisith qammita Yerusalaame heera 13:1–19:42

Goday denddanne bentithi 20:1-31

Kustte qofa: Galila maaqqii fa tamaaritayis benttithi 21:1-25

De7o qaala

¹ Qaala Tiinapp yeza. Qaalaykka Xoossar yeza; ye Qaalay Xoosse.

² Tiina Qaalay Xoossar yeza.

³ Xoossay ubba baz Qaala baggar medhdheeza. Medhintteez bazapp pettii bazkka e baggar medhinttekkabaz baaya.

⁴ Ezar de7o yeza; ye de7ay asis poo7o.

⁵ Poo7ay dhuma poo7iza; dhumay poo7ana gamekkaya.

⁶ Xoossii kiitteez, pettii Waannisa giz asii yeza.

⁷ Asii ubbay E baggar poo7a ammanod garkk E poo7os markka maaqqii ye7eeza.

⁸ E poo7o bagga markattodayis ye7eezaypp atin fa ubbas poo7o baaya.

⁹ As ubbas poo7isiza tuma poo7ay alame yi7iza.

¹⁰ Ezkka alamel yeza. Alamaykka medhdhint-teezay e baggara, zin alamaykka eza erekkaya.

¹¹ E faasitayiko ye7eeza, zin eesitay eza ekkekkaya.

¹² Zin E fana ekkeezitaysinnee E suntha amma-neezeitayis Xooss na7ita maaqqad garkk mawute inggeeza.

¹³ Untikka Xoossapp yelintteezaypp attin as yelinttiza wogay garkk dhiirath shenepp woy ashoppennnee suuth shener yelinttekkaya.

¹⁴ Qaalay as maaqqeeza; aadho keeheititharannee tumatithar kumii nu gancce yezeeza. E adayis pettii na7a maaqqii ekkeez E bonchcha nu be7eeza.

¹⁵ Waannisa E bagga markkatteeza. Fa qaala dhoqqi uddii, «Taanii, «Taapp guyer yi7izay taapp tiin yeza gishos taapp aadhiza» gi markkatteezay yhaya» yeegeeza.

¹⁶ Nuunii ubbitay E aadho keeheitith kunithetithaypp anjjol afa anjjo ekkeeza.

¹⁷ Xoossay higge Muse baggar inggeeza, zin aadho keeheitithinnee tumatithii Yesuusa Kiristoosa baggar ye7eeza.

¹⁸ Xoossa aafer be7eez as oonkka baaya; fa Aday lanqqe yez pettii Na7ay aadda E fa ubbas Xooss maaqqeezay eza qoncce odeeza.

Xamaaqiza Waannisa markketithi

(Mat. 3:1-12; Mar. 1:1-8; Luq. 3:1-8)

¹⁹ Yerusalaame yez Ayihuditay halaqitay, Qeesitaynnee Lewitay, «Neenii oonoo?» gi, Waannisa oyicod garkk eziko kiittin, Waannisa unttsi markkatteez markkatithay yhaya.

20 Waannisa, «Taanii Kiristtoosa baaya» yeegii, milxi udii markkatteezapp attin kaddibe7ekkaya.

21 Unttikka, «Yeezin, ne oonoo? Ne Eelaasane?» yeegii oyiceeza.

Waannisa mahii, «Tana baaya» yeegeeza.

Ma unttii, «Ne ye7od ginttintteez nabay nena-nee?» yeegii oyiceeza.

Waannisa, «Wa77a» gi maheeza.

22 Yeezin, «Ne oonoo? Nuunii nuna kiitteezитайis odod garkk ne nena oona gee?» yeegeeza.

23 Waannisa mahii, «Nabe Isayaasa geezay garkk,

««Godayis oge luulisoytta!»

gi liizho demba uukkiza athay qaalay tana» yeegeeza.

24 Ma Ferisaawe asitay kiitteez asay

25 Waannisako, «Ne Kiristtoosa woy Eelaasa woy nabe baa ixiko, yeezin abis xammaqee?» gi oyiceeza.

26 Waannisa mahii, «Taanii haathar xammaqiza, zin yi eroowa asii yi gancce eqqeeza.

27 E taapp guyer yi7iza. Taanii hara attozin e caamma wodoro billodayis beezooya» yeegeeza.

28 Yeyi ubbay Yordanoose borkkapp seko pino, Bitana katama, Waannisa xammaqiza aqayid haneenza.

Xooss dure

29 Waannisa wonttitha gallas Yesuusa eeko ye7odar bi7ii, «Alame nagara baranchchiza Xooss Duray yhaya!

30 Taanii, «Taapp guyer pettii asii ye7oda. E taapp tiin yeza gishos taapp aadhiza gi odeezay yhaya.

³¹ E oonazako taanii erooya. Zin Isreele asayis eza qoncce kessodayis haathar xammaqttar ye7eeza» yeegeeza.

³² Waannisa yhay garkk yeegii markkatteeza: «Geeshsha Ayyanay salopp holle garkk wodhdhodarannee ezal shemppodar ta be7eeza.

³³ Yeyi hanodaypp tiina ta eza erooya. Zin haathar xammaqodayis tana kiitteez Xoossay, «Geesha Ayyanay wodhdhii ezar yezin neenii be7adayinnee Geeshsha Ayyanar xammaqoday eza» yeegii taas odeeza.

³⁴ Ta yeyi hanodar bi7ii, E Xooss Na7a maaqqeezana markkattiza» yeegeeza.

Yesuusa kaallee tiina taamarita

³⁵ Ma wonttitha gallas Waannisa fa tamaaritaypp nam7itayir wolla eqqeeza.

³⁶ Yesuusa aadhodar Waannisa bi7ii, «Xooss duray yhayshshe!» yeegeeza.

³⁷ Nam7i Waannisa tamaaritay Waannisa gizana si7ii Yesuusana kaalleeza.

³⁸ Yesuusa fana kaallizita guye shirinttii bi7ii, «Yi ab koyinee?» yeegii oyiceeza.

Unttii maaqqii, «Asitamaarayyo, ne aba yessade?» yeegeeza.

³⁹ Yesuusa unttika, «Yhana yi7ii bo7oytta» yeegeeza. Unttii yhanigii E yeza aqa be7eeza. Ye gallas sa7ay taphphii saate heera maaqqiz gishos e langqe peezheeza.

⁴⁰ Waannisa geezana si7ii, Yesuusana kaallee nam77ii tamaaritaypp pettay, Simoon Phixiroosa isha Indiraase.

⁴¹ Indiraase tiina fa isha Simoonar wolihellii, «Nuunii Kiristtoosa denggeeza» yeegeeza.

⁴² Indiraase Simoona Yesuusako ke7eeza.

Yesuusa Simoona bi7ii, «Neenii Yoona na7a Simoona; ne sunthay Kefa a gi xeeginttoda» yeegeeza.

Yesuusa Filphoosarannee Natina7eelara xeegeeza

⁴³ Wonttitha gallas Yesuusa Galila biitta yham-madayis murtteeza. E Filphoosara denggii, «Tana kaalloba!» yeegeeza.

⁴⁴ Filphoosa, Indirasennee Phixiroosa yezeez Beetesayda gizi katamapp ye7eez asii.

⁴⁵ Filphoosa Natina7eelara hellii, «Muse higge maxaafay gancce, ma nabitaykka ebaz xaafeez Yooseefa na7a Naazirete Yesuusa nu dengeeza» yeegeeza.

⁴⁶ Naatina7eela mahii, «Naazirete katamapp lo77o baz kezodayis danda7inee?» yeegeeza.

Filphoosa, «Yi7ii bo7oba» yeegeeza.

⁴⁷ Yesuusa Naatina7eela faako yi7izana bi7ii, «Gene baa tuma Isreele as yhaya!» yeegeeza.

⁴⁸ Naatina7eela Yesuusako, «Neenii tana aba eree?» yeegeeza.

Yesuusa mahii, «Filphoosa nena xeegodaypp tiina, neenii balase mithii oommo yeezin taanii nena be7eeza» yeegeeza.

⁴⁹ Naatina7eela mahii, «Asitamaarayyo, neenii Xooss Na7a! Neenii Isreele kaate!» yeegeeza.

⁵⁰ Yesuusa eeko, «Ta nena balase mithii oommo be7eeza geez gishos ne ammaninee? Neenii yhaypp aathibaz be7ada!» yeegeeza.

⁵¹ Ma Yesuusa, «Taanii yinttis turo odiza; salo dooyinttin, Xooss kiitanchchitay As Na7a afa kezodarannee wodhdhodar yi be7ada» yeegeeza.

2

Yesuusa boss aqo

¹ Hayidzintha gallas Galila biitta Qaana katama bossi yeza. Yesuusa indat ye bossayid yeza.

² Yesuusakka fa tamaritayir wolla ye bossayid xeeqintteeza.

³ Woyne ushshii wurin, Yesuusa indat Yesu-usako, «Unttis woyne ushshii wureeza» yeegeeza.

⁴ Yesuusa mahii, «Ta indatee, ne yhaydda gelippe? Ta woday haga hellekkaya» yeegeeza.

⁵ Yesuusa indat ooso asitayiko, «E yinttis odeez-ibaz ababaz maaqqikokka oothoytta» yeegeeza.

⁶ Ayihuditay fa shaagishe wogas maadinttiza usuppun shuchch gaanitay ye aqayid yeza. Pettii pettii gaanay nam7i woy hayidzii xugga aykkiza.

⁷ Yesuusa ooso asitayiko, «Gaanitayid haathii kunthoytta» yeegeeza. Unttii gaanitayis doona hellodayis haathii kuntheeza.

⁸ Yesuusa untiko, «Yhatti duuqqii boss godayis inggoytta» yeegeeza. Unttii ezisi inggeeza.

⁹ Boss godayis woyne ushshiko laamintteez haatha ganxxii bi7ii anapp ye7eezako erekka, zin haathii kuntheez ooso asitay eriza. Bossa goday machcho ekkizana xeeqii,

¹⁰ «Oonkka lo77o woyne ushshii asa tiinattii ushshiza. Yeezii asay uzhi aleezaypp guye haaxo ushsh inggiza. Zin neenii lo77o woyne ushshii yhanno hellodayis gaddeeza» yeegeeza.

¹¹ Yesuusa yha tiina malata Galila biitta Qaana katama ootheeza; yeyida fa boncha beezeeza. E tamaritay eza ammaneeza.

¹² Yeypp guye, Yesuusa fa indatira, fa ishi-tayirannee fa tamaaritayir wolla Qifirnahoome katama yhanigii xiqqa gallas gam7eeza.

*Yesuusa Xooss karapp zal7izita kessieza
(Mat. 21:12-13; Mar. 11:15-17; Luq. 19:45-46)*

¹³ Ayihuditay bonchchiza Paaziqa Baalay ukkin Yesuusa Yerusalaame yhanigeeza.

¹⁴ Yhanigii Xooss kara gancce gematita, harita, duritannee hollita bayizizitannee fa oydel bettii miishe laammizita denggeeza.

¹⁵ E xurqafer ubbita u mehitayir Xooss karapp bayi7ii bale kessieza. Miishe laammizitay xarphээzitakka shirii olii u miisha laaleeza.

¹⁶ Holle bayizizitana, «Yha hollita yhaypp kessoytta; ta Aday kara gabe mahippate» yeegeeza.

¹⁷ E tamaaritay Geeshsha Maxaafayid, «Taanii ne karayis micinttiza mishay tana tama garkk michchiza giza» ginttinttii xaafintteezana akaa-keeza.

¹⁸ Yeypp guye, Ayihuditay mahii, «Ne yhaya oothodayis neesi mawute yezayis nuna aba malata oothii beezodee?» yeegeeza.

¹⁹ Yesuusakka, «Yha Xooss kara laalloyytta; taanii hayidzii gallasar mahii denthoda» yeegeeza.

²⁰ Maakka Ayihuditay, «Yha Xoossa Kara ke-exxodayis oytamanne usuppun laythi ekkeeza, zin neenii hayidzii gallasar denthode?» yeegeeza.

²¹ Zin Yesuusa odiza Xoossa karay fa asetithibaga.

²² Yey gishos, Yesuusa yhayiqopp denddeezaypp guye e tamaaritay E yeya geezana akaakeezannee Geeshsha maxaafayid xaafintteezannee Yesuusa odeezana ammaneeza.

²³ Yesuusa Paaziqa bonchchiza gallas Yerusalaame yezin, E oothiez mallita bi7ii gaame asay eza ammaneeza.

²⁴ Zin Yesuusa as ubba eriza gishos untan ammanekkaya.

²⁵ As wozina yeza baz E fa ubbas eriza gishos asibaz oonkka ezisi ododay garkk koyekkaya.

3

Yesuusarannee Niqodimoosara

¹ Ferisaawitay baggapp maaqqeez, Ayihuditay halaqay, Niqodimoosa giz pettii athay yeza.

² Niqodimoosa qamma Yesuusako yi7ii, «Asitamaarayyo, neenii Xoossay kiitteez asitamaare maaqqeezana nu eriza. Abis giiko, Xoossay ezar yezaam ixixiko yha ne oothiza mallita oothodayis danda7iza asii baaya» yeegeeza.

³ Yesuusa mahii, «Taanii nees turo odiza; oonkka maaqqii yelinttaam ixixiko Xooss kaatetitha be7adayis danda7ooya» yeegeeza.

⁴ Niqodimoosa, «As cimii wayizii maaqqii yelinttodayis danda7ee? Fa indat ulo maaqqii gelii mahii yelinttodayis danda7inee?» yeegeeza.

⁵ Yesuusa mahii, «Taanii nees turo odiza; oonkka haathapennee Geeshsha Ayyanapp yelinttaam ixixiko, Xooss kaatetith gelodayis danda7ooya.

⁶ Ashopp yelintteezay asho; Ayanapp yelintteezay Ayyana.

⁷ Taanii, «Yi maaqqii yelinttodayis beeziza» gi yinttis odeezay gishos neenii malabaz giippe.

⁸ Carkko fa kozheez bagga carkkiza. Neenii giirtha si7inepp attin aayaypp yi7izako woy aaya yhanigizako erooya. Ayyanapp yelintteez ubbitay yey garkk» yeegeeza.

⁹ Yeezin Niqodimoosa, «Yeyi wayizii hanodayis danda7ee?» yeegii oyceeza.

¹⁰ Yesuusa mahii, «Neenii Isreelitay asitamaare maaqqittar yhaya eroosa?

¹¹ Taanii neesi turo odiza; nu eriza baz odizannee be7eezi baz markkattiza, zin nu markketitha yi ekkooya.

¹² Taanii yinttis sa7abaz odin yi ammanowabaz maaqqiko salobaz odin wayizii ammanodee?

¹³ Salopp wodhdheez As Na7aypp attin salo kezeezay oonkka baaya; [salo yez As Na7ay tana]» yeegeeza.

¹⁴⁻¹⁵ Muse liizho denbal naase shoosh sotteezay garkk eza ammaneez ubbitay medhina de7o ekko-day garkk As Na7ay sotinttodayis beeziza.

¹⁶ Xoossay yha alame qadhdheez gishos fa Na7a petta aath inggod hellodayis cer doseezay eza ammaniza ubbitay medhina laattoday garkkepp attin dhabaamay garkke.

¹⁷ Xoossay fa Na7a yha alame kiitteezay alame pirddodayis baazin alama E baggar ashshodayisii.

¹⁸ Eza ammaniza oonkka pirddinttamii, zin Eza ammanoowa oonkka pettii Xooss Na7a ammanekka gishos yhatti pirddintteeza.

¹⁹ Pirddaykka yhaya: poo7o alame ye7eeza, zin as ooso iita maaqqeez gishos asay poo7opp aathii dhuma doseeza.

²⁰ Iita baz oothiza oonkka poo7o ixkiza. Abis giiko, fa ooso pidhe kezaamay garkk poo7oko ye7ooya.

²¹ Zin tuma oothiz oonkka Xoossay kiitteezay garkk E oothiezana poo7o beezoday garkk poo7oko yi7iza.

Yesuusa bagga markkateez xamaaqiza Waannisa

²² Yeypp guye, Yesuusa fa tamaaritayir wolla Yihuda biitta yhanigeeza. Ezayid xammaqtar untar xiqqa wode gam7eeza.

²³ Ma Waannisa Saleeme lanqqe yez Henoone yeegiz aqo gaame haath yeza gishos asa eza-yid xammaqiza. Asaykka ye aqa yhanigii xam-maqinttiza.

²⁴ Ye wode Waannisa haga acinttekkaya.

²⁵ Yeypp guye, Waannisa tamaaritaynnee Ayihude asay shaagishe woga bagga palameeza.

²⁶ Waannisa tamaaritay Waannisako yhanigii, «Asitamaarayyo, Yorddanoosa borkkapp seko pino neer yezay, neenii ebagga markkatteezay, yezako xammaqiza. Asay ubbitaykka ezik yhanigiza» yeegeeza.

²⁷ Waannisa mahii, «Xoossay inggekka asii ababazikka ekkodayis danda7ooya.

²⁸ «Taanii Kiristtoosa baaya, zin eebb tiina kiitintteeza» maaqqeez gisho yi, yi ubbas taas markka.

²⁹ Gelos giigeezanna ekkodayis giigeez athayssii. Ekkizayis laazanthay kale eqqii E giza

si7eez wode lo7ithii ufayttiza. Yey gishos, yhayi ta ufayssay polintteeza.

³⁰ E gitatodayis taanii xiqqodayis beeziza» yeegeeza.

³¹ Afapp yi7izay ubbaypp afa. Sa7app bent-teezay sa7abaz. E sa7abaz odiza. Salopp yi7izay ubbaypp afa.

³² E fa be7eezbazinnee si7eezibaz markkattiza, zin e markketitha ekkizay baaya.

³³ E markketitha ekkiza oonkka Xoossay tuma maaqqizana beeziza.

³⁴ Xoossay fa Geeshsha Ayyana ees makkekka inggiza gishos Xoossay kiitteezay Xooss qaala odiza.

³⁵ Aday fa Na7a dosii ubba baz e kushayid gad-deeza.

³⁶ Na7a ammaniza athayis medhina de7o yeza. Zin Na7a ammanoowa athayil afa Xooss kachchii ezal yezaypp attin E de7o denggaamii.

4

Yesuusarannee Samaare asito

¹ Yesuusa Waannisasitaypp gaanggiza kaallizita faako shiishizannee xammaqizana Ferisaawitay si7eeza.

² Maaqqikokka Yesuusa taaaritay xammaqeenapp attin Yesuusa oonakka xammaqqekkaya.

³ Yesuusa asay ebaz giza si7ii Yihudapp denddii Galila yhanigeeza.

⁴ Galila yhanigttar Samaarera aadhoday ezisi attambaz maaqqeeza.

⁵ Yeyi gishos, Yayqqooba fa na7a Yooseefas inggeez gade lanqqe yez Sikaare giz Samaare katama yhanigeeza.

⁶ Ye aqayid Yayqqoobas haath olla yeza. Yesuusa yedhdhitar daaburii ye haath ollatii lanqqe betteeza. Ye wode sa7ay usuppun saate heera.

⁷ Pettii Samaare asita ye ollaypp haath tikko-dayis ye7eeza. Yesuusa ye asitiko, «Tana haathe ushshooye» yeegeeza.

⁸ Ye wode Yesuusa tamaritay miiz baz woong-godayis katama yhanigeezaza.

⁹ Ye asita mahii, «Neenii Ayihude as maaqqittar, Samaare maachchi maaqqiz tana wayizii haathe ushshoba gee?» yeegeeza. Yeya iza geezay Ayihuditay Samaaritayir wolihellowa gishshosi.

¹⁰ Yesuusa mahii, «Neenii Xooss imotanee haathe tana ushshooye gizay oonazako ne ereezako eza ne woossodazin; ezikka neesi de7o inggiza haathii immadazin» yeegeeza.

¹¹ Ye asita maaqqii, «Godayyo, nees duuqqizabaz baaya; ollaykka ciimmo. Yeezin, de7o inggiz haath ne anapp denggodee?

¹² Nuus yha haathii olla inggeez nu aday Yayqqoobapp neenii aadhinee? Ezinnee, e na7itaynee e mehitay yha ollaypp uzheeza» yeegeeza.

¹³ Yesuusa, «Yha haathaypp uzheez oonkka maaqqii saaminttoda.

¹⁴ Zin taanii inggod haatha uzhiz oonkka ub-barakka saaminttaamii. Taanii immad haathay e gancce medhinas de7o inggiz goggiz pultto maaqqada» yeegeeza.

¹⁵ Ye asita mahii, «Godayyo, taanii saaminttamay garkkennee haath tikkodayis yha aqa ye7aamay garkk taasi ye haatha inggoba» yeegeeza.

¹⁶ Yesuusa iziko, «Yhanigii ne azina xeeгии ye7oba» yeegeeza.

¹⁷ Ye asita mahii, «Taas azinii baaya» yeegeeza.

Yesuusa iziko, «Taas azina baaya guussayid nees buuta baaya.

¹⁸ Nees tiin ichchin azinttay yeza. Yhatti neer yeza athay ne azine baaya. Neenii yhatti turo odeeza» yeegeeza.

¹⁹ Ye asita mahii, «Godayyo, neenii nabe maaqqizana taanii ereeza.

²⁰ Nu aditay yha derayil afa Xooss goynneeza. Zin yi Ayihuditay asii Xooss goynnodayis beeziza aqay Yerusalaame giza» yeegeeza.

²¹ Yesuusa, «Yhann astte tana ammanoba; yha derayil afa woy Yerusalaame Adayis goynnaam wode ye7oda.

²² Yi Samaaritay eroowazayis goynniza. Zin nuunii atotithi Ayihudepp yi7iz gishos nu erizayis goynniza.

²³ Zin Ada tumar goynnizitay Ayyanarannee tumar goynnod wode ukkeeza; yhattekka helleeza. Yikke, Aday koyizay yhay garkk oger goynnizita.

²⁴ Xoossay Ayyana; ezis goynnizitay Ayyanarannee tumatithar goynnodayis beeziza» yeegeeza.

²⁵ Ye asita mahii, «Kirsttoosa ginttiz «Masay» ye7odana taanii eriza. E yi7ii nuus ubba baz ododa» yeegeeza.

²⁶ Yesuusa, «Yha neer nashizay taanii eza» yeegeeza.

27 Unttii nashshodar, Yesuusa tamaaritay yhanigeez aqaypp maaqqeeza. Yesuusa maachchar wolla nashshodar u bi7ii malabaz geeza. Zin asttiko, «Abi koyee?» Woy Yesuusako, «Izir abis odinttee?» geezay oonkka baaya.

28 Yeypp guye, asita fa haath otana ashshii guye katama yhanigii asitayiko,

29 «Taanii oothiez baz ubba taasi odeez atha be7adayis yedhdhoytta. E Kiristtoosa maaqqad-deshsha?» yeegeeza.

30 Asay katamapp kezii Yesuusako yhanigeeza.

31 Yeyi hanodar, e tamaaritay Yesuusako, «Asita-maarayyo Xiqqa muntta mooye» yegii woosseeza.

32 Zin E, «Taas yi eroowa katha ta miizay yeza» yeegeeza.

33 Yeyi gishos, E tamaaritay woli gancce, «Ezis miizibaz asii ko7o antenna?» yeegeeza.

34 Yesuusa unttiko, «Ta munttay tana kiitteezay shena oothonnee e ooso polodaya.

35 Yi, «Oyddii aginapp guye kathay maxxos helleeza» goosa? Zin taanii yinttis odiza; kathay kaxxii shiishos helleezaya lo7ithii bo7oytta.

36 Zerizayinnee maxxizay wolla ufayttod garkk maxxizay damooze ekkiza ma kathakka medhina de7os shiishiza.

37 Yikke, «Pettay zeriza; yhankkay ma maxxiza» giz oday tuma.

38 Yinttii daaburekazana shiishoday garkk taanii yinttan azazeeza. Yhankkitay oothii daabureez aqo gelii yi u daaburssi aafa ekkeezitta» yeegeeza.

³⁹ Ye asita, «E, taanii ootheetz ubba baz odeeza» gi markkatteez gishos ye katama yez Samaare asaypp gaamitay Yesuusa ammaneeza.

⁴⁰ Samaare asay Yesuusako yi7ii, fa kale gam7oday garkk Yesuusa woossin E ezayid nam77ii gallas betteeza.

⁴¹ E odiza qaalay gishos tiinaasaypp gaame asay ammaneeza.

⁴² Ma untii asttiko, «Yhatti nu ammanizay nu ubbas E giza si7eez gishosapp attin neenii markkatteez gishshos baaya. Ma E tuma yha alame ashshiza maaqqizana nuunii ereeza» yeegeeza.

Yesuusa pettii shuumay na7a patheeza

⁴³ Nam77ii gallasapp guye, Yesuusa yeypp kezii Galila biitta qiteeza.

⁴⁴ Yesuusa fa ubbas, «Nabe fa biittal bonchchint-tooya» yeegii tiinatii odeeza.

⁴⁵ Yesuusa Galila helleez wode Galila asay eza mokkeeza. Abis giiko, Paaziqa Baale bonchchiza gallas untii Yerusalaame yez gishos E ootheetz baz ubbita be7eeza.

⁴⁶ Yesuusa haathe woynе ushshiko laammeez ago, Galila yezi Qaanna katama qiteeza. Qifir-nahome kaatay kara oothizi pettii shuumayis na7ay hargintteeza.

⁴⁷ Yesuusa Yihudapp Galila ye7eezana ye shuumay si7ii eziko ye7eeza. Yhayqqodayis ukkeez fa na7a yhanigii pathod garkk Yesuusa woosseeza.

⁴⁸ Yesuusa shuumayiko, «Xoossay oothiza mallabazinnee mala be7amixiko yi ubbara ammanaam» yeegeeza.

⁴⁹ Shuumay mahii, «Godayyo, ta na7ay yhayqqekka yeezin taar yedhdhooyee» yeegeeza.

⁵⁰ Yesuusa, «Ne kara qitoba; ne na7ay paxoda» yeegeeza.

Ye shuumay Yesuusa geezana ammanii fa kara yhanigeeza.

⁵¹ E fa kara yhammadar e ayllitay eziko yi7ittar ezar ogell hellii, «Ne na7ay paxeeza» geeza.

⁵² E ayllita fa na7ayis aappun saater lo77eezako oyceeza. Unttii maaqqii, «Ziqin laappun saater mishay atteeza» yeegeeza.

⁵³ Na7ay adayi Yesuusa faako, «Ne na7ay paxoda» geezay ye saatte maaqqizana akaakeeza. Yeyi gishos, ezinnee e kara as ubbitay ammaneeza.

⁵⁴ Yeyi Yesuusa Yihudapp Galila yi7ii oothiez nam7intho malla.

5

Yesuusa pettii sila atha patheeza

¹ Yeypp guye, Yesuusa Ayihuditay bonchchiza baalayis Yerusalaame yhanigeeza.

² Yerusalaame Duritay Penge kale Ibraysxe doonar Beetesayida giz deele yeza. Ye haathay lanqqe ichchin shemppo bessitay yeza.

³ [Yeyid haathay eni7odana naagiza gaame harigntteezittay, to7itay, wobbitayinnee gundditay woyi7iza.

⁴ Abis giiko, pettii pettii toke Goda kiitanchchay teqintteez haatha wodhdhii eni7isiza. Haathay eni7odar tiin geleez athay fana aykkeez aba harggepekka paxiza.]

⁵ Ye aqayid hasttamannee hosppun laythi harggintteez pettii athay yeza.

⁶ Yesuusa ye atha bi7ii, ma gaame wode harggintteezana erii athayiko, «Paxodayis koyinee?» yeegeeza.

⁷ Harggintteez athay maaqqii, «Godayoo, haathay eni7odar tana haathay gancce oliza asii baaya. Taanii gelod hanodar haray taapp tiinattii geliza» yeegeeza.

⁸ Yesuusa eziko, «Denddii eqqoba; ne arssa tookkii qitoba» yeegeeza.

⁹ Athay izir ellis paxeeza; fa arssa tookkii qitteeza.

Yeyi maala gallasar haneeza.

¹⁰ Yeyi gishos, Ayihuditay paxeez athayko, «Yhayino sa7ay maala; neenii ne arssa tookkizay woga baaya» yeegeeza.

¹¹ Zin athay, «Tana patheezay, ne arssa tookkii qitoba geeza» yeegii maheeza.

¹² Unttii eziko, «Nena, ne arssa tookkii qitoba geezay E oonoo?» yeegii oyiceeza.

¹³ Zin Yesuusa ye aqayid gaame as ganccer erisekkazar aadhii qiteez gishos athay fana patheezay oonazako erooya.

¹⁴ Yesuusa guyepp ye atha Xooss Keetha denggii, «Yhatt, neenii paxeeza; yhaypp iita baz nena hellaamay garkk maaqqii nagara oothippe» yeegeeza.

¹⁵ Yeypp guye, athay yhanigii fana patheezay Yesuusa maaqqeezana Ayihuditayis odeeza.

¹⁶ Yesuusa yeya maala gallas oothiez gishos Ayihuditay Yesuusa bay7ith aykkeeza.

¹⁷ Yesuusa maaqqii, «Ta Aday ubba wode oothiza; taakka oothodayis beeziza» yeegeeza.

¹⁸ Yesuusa maala bonchcheka gishos aadda baazin Xoossa fa Ade gi fana Xoossar ukkulsseez gishos Ayihuditay eza wodhodayis tiinaasaypp miinthii koyiza.

Xooss Na7ay mawute

¹⁹ Yesuusa mahii, «Taanii yinttis turo odiza; Na7ay fa aaddas abikka oothodayis danda7ooya. E fa Aday oothodar be7eezana aadda oothiza. Aday oothizana Na7aykka oothiza.

²⁰ Aday fa Na7a qadhdhiza gishos E oothiz ootho ubba fa Na7a beeziza. Yi malabaz goday garkk E yhaypp aadhiz ooso fa Na7a beezoda.

²¹ Aday yhayqqeezita yhayiqopp denthii untis de7o inggizay garkk Na7aykka fa koyizitayis de7o inggiza.

²² Aday Na7ayis pirdde mawute ubba inggeezapp attin E oonakka pirddooya.

²³ Asay ubbitay Ada bonchchizay garkk Na7akka bonchchoda. Na7a bonchchowa oonkka Na7a kiitteez Adakka bonchchooya.

²⁴ «Taanii yinttis turo odiza; ta qaala si7izitayinnee tana azazeezana ammanizay medhina de7o yeza. E yhayiqopp de7o piinggeez gishos pirddinttamii.

²⁵ Taanii yinttis turo odiza; yhayqqeez asay Xooss Na7a qaala si7iz wode ye7oda; yeykka yhatte. Ye qaala si7izay de7or yezoda.

²⁶ Adayis ees de7o yezay garkk Na7ayiskka ees de7o yezoday garkk inggintteeza.

²⁷ As Na7a maaqqiz gishos Aday Na7ayis pirdde mawute inggeeza.

²⁸ «Duufo yezitay e qaala si7ii dendod wode ye7od gishos yhaya malabaz giippate.

²⁹ Lo77o ootheezittay de7or yezodayis ma iita ootheezittay pirdde ekkodayis duufopp dendoda.

³⁰ «Taanii ta mawuter ababazikka oothodayis danda7ooya. Xoossay taasi odeezay garkk pird-diza. Taanii tana kiitteezay koyiz baz oothizapp attin ta koyiz baz oothowa gishos ta pirdday tuma.

Yesuusas markkatteez asito

³¹ «Taanii tabaz markkatiko ta markkatithay tuma baaya.

³² Ta bagga markkattizay hara yeza; E tabaz markkattizay tuma maaqqizana taanii eriza.

³³ «Yi Waannisako as kiittin E tumas markkat-teeza.

³⁴ Taanii yeya yinttis odizay, yi attod garkk geezapp attin as markkatithii taas koshsheez gishsho baaya.

³⁵ Waannisa muqaadday garkk eexittar poo7eeza. Yi xiqqa wodes E poo7ayid ufayteeza.

³⁶ «Zin taasi Waannisapp aadhiz markka yeza. Taanii oothod garkk ta Aday taasi inggeez oositay ta bagga markkattiza; Aday tana azazeezana beeziza.

³⁷ «Ma tana kiitteez Aday fa ubbas tabaz markkattiza. Yi E qaala ubbarakka si7ibe7ekka woy e malla bi7ibee7ekkaya.

³⁸ E azazeezana yi ammanoowa gishos e qaalay yi wozina gancce baaya.

³⁹ «Geeshsha Maxaapitaypp medhina de7o dem-madbaz yinttis aazin untan pilagiza; untii tabaz markkattiza.

⁴⁰ Zin yi de7o denggodays taako ye7odayis koy-ooya.

⁴¹ «Asapp taanii bonchcho koyooaya.

⁴² Zin taanii yi wozina gancce Xooss qadhe baza eriza.

⁴³ Taanii ta Aday mawuter ye7eeza, zin tana mokkekkaya. Haray fa mawuter yi7iz wode eza mukkiza.

⁴⁴ Yi pettay pettaypp bonchcho koyizitay, pettii Xoossapp yi7iz galata ekkodayis koyoozitay, way-izii tana ammanodayis danda7ee?

⁴⁵ «Taanii ta Aday tiina yinttan mootizabaz yint-tis aazippe. Yinttan mootoday yi ufayssar naagiz Muse.

⁴⁶ Yi Muse ammaneez baz maaqqeezako E ta bagga xaafeez gishos tanakka ammanodazin.

⁴⁷ Zin yi E xaafeezana ammanaam ixkiko ta qaala wayizii ammanodee?» yeegeeza.

6

*Yesuusa ichchin mukulo as muzeeza
(Mat. 14:13-21; Mar. 6:30-44; Luq. 9:10-17)*

¹ Yeypp guye, Yesuusa Xibiradoosa giz Galila Abbapp seko pino piinggeeza.

² E harggintteezitta fathor oothiez malla be7eez gishos gaame asay eza kaalleeza.

³ Yesuusa derell afa kezii, ezayid fa tamaaritayir wolla betteeza.

⁴ Ayihuditay bonchchiza Paaziqa Baale gallasay helleeza.

⁵ Yesuusa gaame asay faako yi7izana bi7ii Filphoosako, «Yha asa ubbita muzodayis gidiza katha anapp woommadee?» yeegeeza.

⁶ E yeya Filphoosa faaccodayis geezapp attin E fa ubbas ab oothodazako eriza.

⁷ Filphoosa maaqqii Yesuusako, «Hara attozin, Ommar ommar, pettii pettii baadhithi helthodayis, nam7i xeet diinaarer soollo wonggikokka gidaamii» yeegeeza.

⁸ Ma Yesuusa tamaritaypp pettay, Simoon Phixiroosa ishay Indiraase,

⁹ «Ichchin bangga soollora nam77ii molo ayk-keez pettii na7ayyhaydda yeza, zin yha as ubbayis yey ab maaddodee?» yeegeeza.

¹⁰ Yesuusa fa tamaritayiko, «Asa bettithoytta» yeegeeza. Ye aqayid gaame maata yeza; asay ubbitay beteeza. Dhiirathi asitay taybay ichchin mukulo maaqqada.

¹¹ Yesuusa soolla ekkii Xooss galatii maaqqii ezayid betteez asayis gisheeza. Molakka ekkii yhay garkk uddii inggin, asay fa koyeezay garkk meeza.

¹² U ubbitay mizheezaypp guye Yesuusa fa tamaritayiko, «Pettii bazikka iitam garkk atteez gufa shiishoytta» yeegeeza.

¹³ Yeyi gishos, u ubba shiisheeza. Asay miin atteez bangga soollo gufa shiishii taphpho nam77ii leemate kuntheeza.

¹⁴ Asay Yesuusa oothee malla bi7ii «Yhayi tuma yha alame ye7od gintintteez nabe» yeegeeza.

¹⁵ Yesuusa u eza aykkii wolqqar kawutisodayis qoppeezana erii, fa aaddas derell afa maaqqii kezeza.

*Yesuusa abbal afar yedhdheeza**(Mat. 14:22-33; Mar. 6:45-52)*

¹⁶ Sa7ay omathodar Yesuusa tamaaritay abbako wodhdheeza.

¹⁷ Sa7ay qammeez gishos Yesuusa haga untiko ye7ekka gishos e tamaaritay wogolo gancce gelii abba piinggii qifirnahooma yhammadayis dend-deeza.

¹⁸ Wolqqama carkko carkkeez gishos abbay eni7iza.

¹⁹ Ichchin woy usuppun kilo mitire maaqqoday garkk u abba pidhi yhanigeezaypp guye Yesuusa abbal afar yedhdhittar yi7izana bi7ii yashitteeza.

²⁰ Zin E, «Yashittifatte, tana be» yeegeeza.

²¹ Unttii ufayttii eza wogolo gancce gelsseeza; izir wogolay u yhanigiza abba gaxa helleeza.

Yesuusa de7o soollo

²² Wonttitha gallas abbapp seko pino atteez gaame asay pettii wogolo aadda yezana be7eez gishosinne Yesuusa fa tamaaritayir wogolo gancce gelii, untar yhanigozannee u fa aaddas yhanigeezana akaakeeza.

²³ Zin Xibaaradoosapp hara wogolitay Yesuusa Xooss galatin, asay soollo meez aqa ye7eeza.

²⁴ Asay Yesuusa woy e tamaaritay ezayid baazana bi7ii, Yesuusa koyodayis wogolitayid gelii qifirnahooma yhanigeeza.

²⁵ Asay Yesuusa abbapp seko pino dengeez wode «Asitamaarayyo, yhana wudayid ye7eenee?» yeegeeza.

²⁶ Yesuusa maaqqii, «Taanii yinttis turo odiza; yi tana koyizay soollo mi mizheez gishospp attin malla be7eez gishshos baaya.

27 Dhabiza kathas oothippate, zin medhinas de7o inggiz kathas oothoytta. Xooss Aday E oothod garkk ezis mawute inggeez gishos ye katha As Na7ay yinttis immada eriseeza» yeegeeza.

28 Yeezin unttii, «Nuunii Xooss ootho oothodayis ab oothodee?» yeezii Yesuusa oyiceeza.

29 Yesuusa maaqqii, «Yi oothod garkk Xoossay koyiz ooso yhaya: E azazeezana ammanoytta» yeegeeza.

30 Unttii mahii, «Nuunii bi7ii, nena ammanod garkk aba malla ne bessade? Ne ab oothodee?

31 Geeshsha Maxaafayid, «U maad garkk soollo salopp inggeeza» ginttinttii xaafintteezay garkk nu aditay liizho denba manna meeza» yeegeeza.

32 Yesuusa, «Taanii yinttis turo odiza; yinttis salopp tuma soollo inggeezay ta Adaypp attin Muse baaya.

33 Yikkee, Xoossay inggiz soollay salopp wodhd- heezay alamayis de7o inggiza» yeegeeza.

34 Unttii mahii, «Godayyo, nuus ye soolla ubba gallas inggoba» yeegeeza.

35 Yesuusa, «Taanii de7o inggiza soollo; taako yi7iz oonkka ubbarakka nayinttena. Ma tana ammaniza athay ubbarakka saaminttena.

36 Zin taanii yinttis odeeza; yi tana be7eeza, zin ammanooya.

37 Ta Aday taasi inggiz ubbitay taako ye7oda; ma taako yi7iz oonakka bale dakkamii.

38 Taanii ta koyiz baz oothodayis baazin tana kiiteezay koyiz baz oothodayis salopp ye7eeza.

39 Tana kiiteezay koyizay yhaya: taanii E taas inggeez ubbitakka wurssith gallas yhayiqopp

denthoday garkkepp attin pettaka dhabisod garkk koyooya.

⁴⁰ Yikke, ta Aday koyizay yeya: Na7a bi7ii ammaniza ubbitay medhina de7o ekkoda; taanii ye ubbita wurssith gallas medhina de7os yhayiqopp denthoda» yeegeeza.

⁴¹ Yesuusa, «Taanii salopp wodhdheez soollo» geez gishos Ayihuditay eza zigireeza.

⁴² Unttii, «Yhayi nuunii e adannee e indat eriza Yooseefa Na7a Yesuusa baasannee? Yeezin, E wayizii, «Taanii salopp wodhdheez» godayis danda7inee?» yeegeeza.

⁴³ Yesuusa mahii, «Pettay pettayira zigiriza ashshoytta.

⁴⁴ Tana kiiteez ta Aday taako ki7iza asapp attin taako ye7odayis danda7iza oonkka baaya. Taanii wurssithii gallas eza medhina de7os yhayiqopp denthoda.

⁴⁵ Nabitay, «Xoossay as ubba tamarssoda» yeegii xaafeeza. Ada si7izayinnee ezipp tamariza oonkka taako yi7iza.

⁴⁶ Xooss lanqqepp ye7eezaypp attin Ada be7eezay oonkka baaya; e aadday Ada be7eeza.

⁴⁷ «Taanii yinttis turo odiza; tana ammaniza ooskka medhina de7o yeza.

⁴⁸ Taanii de7o inggiz soollo.

⁴⁹ Yi aditay liizho demba manno meeza, zin yhayqqeeza.

⁵⁰ Salopp yi7iz soollay yhaya; ye soolla miiz oonkka yhayqqaamii.

⁵¹ Salopp ye7eez de7o soollay tana. Oonkka yha soollo miiko medhinas yezoda. Ma yha alamay

de7or yezod garkk taanii yinttis immad soollay ta asho» yeegeeza.

⁵² Ayihuditay, «Yha athay fa asho nu maad garkk nuus wayizii immadayis danda7ee?» yeezii woli gancce palameeza.

⁵³ Yey gishos, Yesuusa untiko, «Taanii yinttis turo odiza; As Na7a asho, yi maam ixiko, e suutha yi uzhaam ixiko, yinttis de7o baaya.

⁵⁴ Ta asho miiz athayisinnnee ta suutha uzhiiz athayis medhina de7o yeza. Taanii wursith gallas eza yhayiqopp denthoda.

⁵⁵ Ta ashay tuma muntta; ta suuthaykka tuma ushshii.

⁵⁶ Ta asho miiz athayinnnee ta suutha uzhiiz athay taar yeziza; taakka ezar yeziza.

⁵⁷ De7o Aday tana kiittin, taanii e baggar de7or yezay garkk, tana miiz athaykka ta baggar de7or yezoda.

⁵⁸ Salopp wodhdheez soollay yhaya: yi aditay mi yhayqqeez mannay garkk baaya; yha soolla miiz athay medhinas yezoda» yeegeeza.

⁵⁹ Yesuusa qifirnahooma katama Ayihuditay Woosa Keetha yhaya taamarsseeza.

Medhina de7o qaala

⁶⁰ Yesuusa taaaritataypp gaame baggay yeya si7ii «Yhayi gelowa timirtte; yhayi oos gelee?» yeegeeza.

⁶¹ Yesuusa fa taaaritatay yeyis zigireezana erii, «Yhayi yinttan dhubbinnee?

⁶² Yeezin, As Na7ay tiin yezabessa pude kezodar yi bi7ii waagodeshsha?

⁶³ Ayyanay de7o inggiza; as wolqqa abikka maaddooya. Ta yinttis odiza qaalay de7o inggiz geeshsha Ayyanapp yi7iza.

⁶⁴ Zin yi gancce ammanoozitay yeza» yeegeeza. Ammanoozitay oonanttazako Yesuusa tiinapp aykkii eriza. Ma fana aathii immaday oonazako eriza.

⁶⁵ Maakka Yesuusa, «Aday yhanigoba geekka oonkka taako ye7odayis danda7ooya gi taanii odeezay yey gishshosi» yeegeeza.

⁶⁶ Yeyi gishos, Yesuusa kaallizitaypp gaamitay eza ashshii guye maaqqeeza; maaqqii eza kaal-libe7ekkaya.

⁶⁷ Yesuusa taphpho nam77ii fa taamarita, «Yint-tikka ashshii yhammadayis koyinee?» yeegii oy-iceeza.

⁶⁸ Simoon Phixiroosa mahii, «Godayyo, nuunii ook yhammadee? Ne medhina de7o inggiz qaalay yeza.

⁶⁹ Neenii Geeshsha Xoossay na7a maaqqeezana nuunii ammanizannee eriza» yeegeeza.

⁷⁰ Yesuusa untiko, «Taanii yinttan taphpho nam7ita maraxxekasa? Zin yinttipp pettay xalahe» yeegeeza.

⁷¹ Yesuusa yeya geezay Simoona Na7a Asiqoroto Yihudasi. Yihuda Yesuusana aathii immadayis yezi taphpho nam77ii tamaritaypp petta.

7

Yesuusarannee e ishitayira

¹ Yeypp guye, Ayihuditay Yesuusa wodhodayis koyiz gishos E Yihuda ashshii Galilar yuuyeeza.

² Ayihuditay bonchchiza daase Baale bonchch-inttodayis ukkeeza.

³ Yeyi gishos, Yesuusa ishitay, «Ne tamaaritay neenii oothiz mallita be7ad garkk yhaypp denddi Yihuda biitta qitoba.

⁴ Paas erinttodayis koyiz as oonkka fa oosa qosooya. Neenii yhayitita oothii ne bagga alama erisoba» yeegeeza.

⁵ E ishitay yeya geezay ezal ammanaam ixxeez gishshosi.

⁶ Yesuusa untiko, «Taas woday hellekkaya, zin yinttis ubba woday giiga.

⁷ Alamay yinttan ixxodayis danda7ooya, zin taanii alamay oosay iita maaqqizana markkattiz gishos tana ixxiza.

⁸ Yi baala yhanigoyttta; ta woday hellekkazay gishos taanii baala yhanggaamii» yeegeeza.

⁹ E yeya gi Galila atteeza.

Yesuusa baala bonchchodayis yhanigeeza

¹⁰ E ishitay baala bonchchodayis yhanigeeza-ypp guye Yesuusa oonakka erisekkazar qosor ye aqa yhanigeeza.

¹¹ Ayihuditay baala bonchchiza aqayid, «E aba yenee?» yeegii eza koyeeza.

¹² Asay kalkkashii ebagga odinttodar baggitay, «E lo77o as» godar atteez asay ma, «Wa77a, E wo ya balithiza» yeegiza.

¹³ Zin Ayihude halaqitayis yashitteez gishos oonkka ebagga geesha odinttodayis danda7ekmaya.

¹⁴ Baala bonchchii gaabba helithodar Yesuusa Xoossa keethi yhanigii taamarso aykkeeza.

¹⁵ Ayihuditay, «Yha athay timirtte tamaarekazar yhaya ubba wayizii ereennee?» yeegii malabaz geeza.

¹⁶ Yesuusa mahii, «Ta taamarssiza timirttay tana kiitteez Xoossapp yi7iz timirttepp attin tabaz baaya.

¹⁷ Xooss azazo oothodayis koyiz oonkka yha timirttay Xoossapp yi7izakonnee woy taanii taapp odizako eroda.

¹⁸ Paapp odiz oonkka fa ubba bonchcho koyiza. Zin fana kiitteezay bonchcho koyiz oonkka E tumanchcho; ezar worddo baaya.

¹⁹ Muse yinttis higge inggeeza, zin yinttipp oonkka higge naagekkaya. Yeezin abis tana wodhodayis koyee?» yeegeeza.

²⁰ Asay mahii, «Neell xalahe yeza; nena wodhodayis oonoo koyizay?» yeegeeza.

²¹ Yesuusa, «Taanii pettii malla uddin yi ubbitay malabaz geeza.

²² Yinttii, yi na7ita dookalodgarkk Muse azazeeza. Zin dookalo yi mayzitay udo aykkeezapp attin Muse baaya. Yeyi gishos, yi maala gallas dhiirath na7ita dookaliza.

²³ Muse higgay kiitteez gishos yi maala gallas dookalizabaz maaqqiko, taanii pettii asii kunthi galla patheeze gishos taar abis kaccee?

²⁴ Tuma pirdde pirddoyttapp attin as aafe bi7ii pirddippate» yeegeeza.

Yesuusa, E Kiristtoosa?

²⁵ Yerusalaame asaypp pettay pettay, «U wodhodayis koyiz athay yhaya baasa?

²⁶ Yeezako, e pidhdhe odiza; untii eza abikka gooya. E Kiristtoosa maaqqizana halaqitay tuma erineshsha?

²⁷ Kiristtoosa yi7iza wode E anapp yi7izako oonkka erooya, zin e anapp ye7eezako nu eriza» yeegeeza.

²⁸ Yesuusa Xooss Keetha tamarssittar fa qaala dhoqqi udii, «Tuma yi taanii oonazakonnee ta anapp ye7eezako erinee? Taanii ta mawuter ye7ekkaya, zin tana kiitteezay tuma; yi eza erooya.

²⁹ Zin taanii E kiittin e lanqqepp ye7eez gishos eza eriza» yeegeeza.

³⁰ Yeyi gishos, untii eza aykkodayis koyeeza. Zin e woday haga hellekkazay gishos oonkka ezal afa kushe gaddekaya.

³¹ Zin gaame asay Yesuusa ammanii, «Kiristtoosa ye7odar yha athay ootheez mallitaypp gaanggiza mallita oothodennee?» yeegeeza.

Yesuusana aykkodayis wotaaddaritay kiittint-teeza

³² Ferisaawe asay gaame asay Yesuusa oosay bagga kalkkashodar si7eeza. Qeese halaqitayinne Ferisaawe asay eza aykkii acishodayis Xooss keetha naagizita azazeeza.

³³ Yesuusa, «Taanii yinttar xiqqa wode gam7oda; yeypp guye tana kiitteezayiko yhammada.

³⁴ Yi tana koyoda, zin denggaamii. Taanii yeza aqa yi ye7odayis danda7ooya» yeegeeza.

³⁵ Ayihuditay pettay pettayira, «yhayi nuunii denggowa aqo aba yhammad hanee? Girike katama gancce yez Ayihuditayiko yhanigii Girikita tamarssodayis haninenee?

³⁶ «Yi tana koyoda, zin denggaamii» ma, «Taanii yezabessa yi ye7odayis danda7ooya» guussay abi guusso?» yeegeeza.

De7o haath

³⁷ Baala bonchchiza gallasitaypp wolqqamanne wurssith gallas Yesuusa denddi, fa qaala dhoqi uddii, «Saamintteez oonkka taako yi7ii uzho.

³⁸ Tana ammaniza oonkka geeshsha Maxaafe geezay garkk de7o inggiz pultto haathay e ganccepp goggoda» yeegeeza.

³⁹ E yeya geezay eza ammaneezitay ekkodayis yez geeshsha Ayyaanabagga. Yesuusa haga bonchchintteka gishos ye wode geeshsha Ayyanay ingginttekkaya.

As gancce shaakintto medhintteeza

⁴⁰ Ye asaypp gaamitay E giza si7ii, «Tuma yhayi nabe» yeegeeza.

⁴¹ Yhankkitay ma, «Yhayi Kiristtoosa» yeegeeza. Zin atteez asay ma, «Kiristtoosa Galilapp ye7odene?»

⁴² Geeshsha Maxaafay, «Kiristtoosa Dawite sheeshapp Dawitte yezeez Beeteleme katamap ye7oda» yeegosanee?» yeegeeza.

⁴³ Zini, Yesuusa gishos asay woli gancce shaakintteeza.

⁴⁴ Ye asaypp pettay pettay eza aykkodayis koyeeza, zin oonkka ezal afa kushe gaddekaya.

Ayihude halaqitay ammanekaya

⁴⁵ Xoossa Keethi naagizitay qeese halaqitayikorannee Ferisaawitayiko guye maaqqii yi7in untii, «Abis eza ke7ekkasa?» yeegii oyiceeza.

⁴⁶ Xoossa Keethi naagizitay untiko, «Yha athay odizay garkk oonkka odinttooya» yeezii maheeza.

⁴⁷ Ferisaawe asay mahii, «E yinttanakka balitheenee?

⁴⁸ Ayihude halaqqitaypp woy Ferisaawe asaypp eza ammaneez as yenee?

⁴⁹ Muse higge eroowa yha asay baaditteeza» yeegeeza.

⁵⁰ Ferisaawitaypp pettay qamma Yesuusako yhanigeez Niqodimoosa untiko,

⁵¹ «Pettii asii giz baz si7ekkazar woy E ab ootheezako erekkar tiinattii ezal afa pirdizay nu higgayid yenee?» yeegeeza.

⁵² Unttii maaqqii, «Neekka ma Galila biitta aso? Galila biittapp nabe kezaamiza geeshsha Max-aafaypp pilagii denggoba» yeegeeza.

⁵³ *Ubbitay fa kara fa kara qiteeza.

8

Lagitar aykintteez asito

¹ Yesuusa Woyira Derell afa qiteeza.

² Ma wonttitha gallas guura Xoossa keethi maaqqeeza. Gaame asay eziko yi7in bettii untan taamarseeza.

³ Higge asitamaaritayinnee Ferisaawe asay lagitodar aykkeez pettii asito eziko ke7eeza. U as ubbay tiina izo essii,

⁴ «Asitamaarayyo, yha asita lagitodar nu aykkeez.

⁵ Muse higgay yhann garkk asita shuchchar cadinttii yhayqqod garkk kiittiza. Yeezin, neenii waagee?» yeegeeza.

* **7:53** Bini pettii pettii maxaafitayid Waan 7:53 baaya.

⁶ U yeya geezay Yesuusana paaccii eza mootiz-abaz demmadayisii. Zin Yesuusa zuggii fa birad-hdher sa7all xaafeeza.

⁷ U eza mahii mahii oyicii ashshaamii ixxin, pude dhoqqi gi, «Yi gancce nagara oothekka as tiinatii izo shuchchar shoco» yeegeeza.

⁸ Maakka zuggii sa7all xaafeeza.

⁹ Unttii yeya si7eez wode cimitaypp aykkii pet-tay pettay kezitar wureeza. Yesuusa aadda ye aqayid eqqeez asitir atteeza.

¹⁰ E pude dhoqi gi asitiko, «Yhan astte, asay ana yhanigeenee? Neell pirddeez oonkka baasa?» yeegeeza.

¹¹ Ya asita, «Godayyo, oonkka baaya» yeegeeza.

Yesuusa mahii, «Taankka neell afa pirddaamii. Qitoba; yhannipp maaqqii nagara oothippe» yeegeeza.

Yesuusa alames poo7o

¹² Maakka Yesuusa asayiko, «Taanii alames poo7o. Tana kaalliza oonkka de7o inggiz poo7ana dengodaypp attin dhuma gancce wutenna» yeegii odeeza.

¹³ Ferisaawe asay, «Ne nebaz markkattiza, zin ne markkatithay tuma baaya» yeegeeza.

¹⁴ Yesuusa mahii, «Taanii tabaz markkattikokka ta markkatithay tuma. Abis giiko, taanii anapp ye7eezako ma ana yhanigizako eriza, zin yi erooya.

¹⁵ Yi as qofal pirddiza; taanii pettii asallakka pirddaamii.

¹⁶ Taanii pirddiza baz maaqqikokka ta pirdday tuma. Abis giiko, tana kiitteez ta Aday taar yeza-pp attin taanii ta aaddas baaya.

17 Nam77ii as markkatithii miinggiza yey yi hig-gayid xaafintteeza.

18 Taanii tabaz ta ubbas markkattiza; ma tana kiitteez ta Aday tabaz markkattiza» yeegeeza.

19 Unttii, «Ne aday aba yenee?» yeegii eza oy-iceeza.

Yesuusa mahii, «Yi tana woy ta Ada erooya. Tana eriza maaqqeezako, yi ta Adakka erodazin» yeegeeza.

20 Yesuusa Xoossa Keethi muxaata miishe oliz saaxine yez bessa yeya taamarsseeza. E qammay haga hellekkazay gishos oonkka eza aykkekkaya.

21 Maakka Yesuusa untiko, «Taanii yhammadazin; yi tana koyoda, zin yi atosithi dengaamii yi nagarara yhayqqoda. Taanii yhanigiza aqo yhammadayis yi danda7ooya» yeegeeza.

22 Ayihude halaqitay, «E, «Taanii yhanigiza aqo yi yhammadayis danda7ooya» yeegeeza. E fana fana fa aaddas wodhodayisonee?» yeegeeza.

23 Yesuusa mahii, «yi sa7app; ta afappe. Yi yha alamaypp, ta yha alamaypp baaya.

24 Yi atosithi dengaam yi nagarara yhayqqod gi ta yinttis odeezay Yhayisii. Taanii Tana yi am-manaam ixkiko yi atosith dengaamii yi nagarara yhayqqoda» yeegeeza.

25 Unttii, «Neenii oonoo?» yeegii oyiceeza. Yesu-
usa maaqqii, «Taanii, tiinapp yinttis odeezay tana.

26 Taanii yi baz odii pirddiza baz gaame baz yeza. Zin tana kiitteezay tumanchcho; ma ta eebb si7eezan aadda alamayis odiza» yeegeeza.

27 Yesuusa fa Adaybagga odizana u akaakekkaya.

²⁸ Yeyi gishos, Yesuusa untiko, «Yi As Na7a pude dhoqi oothiza wode Taanii Tana Maaqqeezana yi eroda. Maakka taanii ta silixaaner abikka oothodanee ta Aday tana tamaarsseezana odiza yi eroda.

²⁹ Tana kiitteezay taar yeza. Taanii ubba wode eza ufayssiza baz oothiza gishos E tana ta ubbas ashshekkaya» yeegeeza.

³⁰ Yesuusa yeya ododar si7eez gaame asay eza ammaneeza.

Nagara aylletithap kessii

³¹ Yesuusa fana ammaneez asitayiko, «Yi ta timirttayis kiittintiko tuma tana kaallizita.

³² Yi tuma eroda; tumaykka yinttan wozii ekkoda» yeegeeza.

³³ Unttii mahii, «Nuunii Afraame sheeshii; nuunii ooskka aylitibe7ekkaya. Ne waagii, «Yi wozint-toda gee?» yeegeeza.

³⁴ Yesuusa mahii, «Taanii yinttis turo odiza; nagara oothizi oonkka nagara ayle.

³⁵ Ayle medhinas kara asar yezooya, zin na7ay medhinas kara asar yeziza.

³⁶ Na7ay yinttan woziko yi tuma wozinttoda.

³⁷ Yi Afraame sheesh maaqqeezana taanii eriza. Zin ta qaalay yi wozina gancce baazay gishos tana wodhodayis koyiza.

³⁸ Taanii ta Aday tana beezeezana odiza, zin yinttika yi adaypp si7eezan oothiza» yeegeeza.

³⁹ Unttii mahii, «Nu adayi Afraame» yeegeeza.

Yesuusa untiko, «Yi Afraame na7ita maaqqeezako E ootheezana oothoda.

⁴⁰ Zin Xoossapp si7eez tuma odeez tana yi wod-hodayis koyiza. Afraame yhay garkk oothekkaya.

⁴¹ Yinttii, yi adayi ootheezana oothiza» yeegeeza.

Unttii mahii, «Nuunii lagiter yelintteez na7ita baaya; nuus pettii Aday Xoossay aadda yeza» yeegeeza.

⁴² Yesuusa untiko, «Xoossay tuma yi ade maaqqeezako yi tana qadhdhoda; abis giiko, ta Xooss lanqqepp yi7ii yhaydda yeza. Tana E kiitteezapp attin taanii ta mawuter ye7ekkaya.

⁴³ Taanii giza yi si7odayis kozhoowa gishos ta giz baz yinttis gelooya.

⁴⁴ Yinttii, yi aday xalehay na7ita. Ma yint-tii, yi adayi amottizbaz oothodayis koyiza. E tiinap aykkii shemppo wodhiza. Tuma ezar baazay gishos E tuma ixxiza. Worddo ezis medho maaqqeez gishonnee E worddo adenne worddo odinttitar paap odinttiza.

⁴⁵ Taanii turo odiza, zin yi tana ammanooya.

⁴⁶ Yinttapp, «Neenii nagara oothodar ta be7eeza» godayis danda7izay oonoo? Taanii turo odinttiz-abaz maaqqiko tana abis yi ammanoosa?

⁴⁷ Xooss asii Xoossay giz baz si7iza. Yi Xooss as maaqqekka gishos Xoossay giz baz si7ooya» yeegeeza.

Yesuusa Afraamepp tiina

⁴⁸ Ayihuditay mahii, « «Neenii Samaare asii; neell tuna ayyana yeza» guusayid buuta yenee?» yeegeeza.

⁴⁹ Yesuusa untiko «Taal afa tuna ayyana baaya. Taanii ta Ada bonchchiza, zin yi tana kawushshiza.

⁵⁰ Taanii ta ubbas bonchcho koyooa; taanii bonchchinttod garkk koyizaynnnee taas pirdidizay yeza.

⁵¹ Taanii yinttis turo odiza; ta qaala naagiz oonkka yhayqqaamii» yeegeeza.

⁵² Ayihuditay mahii, «Neell afa tuna ayyana yezana nuunii yhatti ereeza. Afraame yhayqqeeza; nabitaykka yhayqqeeza. Zin neenii, «Ta qaala naagiz oonkka yhayqqaamii» yeegeza.

⁵³ Neenii yhayqqqeez nu ada Afraamepp aad-hinee? Nabitaykka ma yhayqqeeza. Neenii nena oona gi qoppee?» yeegeeza.

⁵⁴ Yesuusa, «Taanii tana bonchchiko ta bonchchay cere. Yi, «Nu Xoossa» giz ta Aday E tana bonchchiza.

⁵⁵ Yi eza eraami ixkiko taanii eza eriza. Taanii eza erooya giiko yi garkk worddotiza. Zin taanii eza eriza; ma e qaallakka ta naagiza.

⁵⁶ Yi adayi Afraame ta yi7ith gallasa bi7ii ufayt-todayis amotteeza; bi7ikka ufaytteeza» yeegeeza.

⁵⁷ Ayihuditay mahii, «Hara attozin, nees ishatam laythi kumekkazin wayizii Afraame be7eeza gee?» yeegeeza.

⁵⁸ Yesuusa untiko, «Taanii yinttis turo odiza; Afraame yelinttodaypp tiin taanii yeza» yeegeeza.

⁵⁹ Yeyi gishos, untii Yesuusa shocodayis shuchchi ekkeeza. Zin Yesuusa untapp geemmii Xoossa keethapi kezii qitteeza.

9

Yesuusa to7a maaqqii yelintteez atha patheeza

¹ Yesuusa yhanigittar yelintteezaypp to7a maaqqii yez pettii atha be7eeza.

² E tamaritay, «Asitamaraayyo, yha athay to7a maaqqii yelinttod garkk nagara oothээzay oonoo? E oothenenne eza yeleezıtay ootheenee?» yeeгii oyıceeza.

³ Yesuusa, «Xoossa ooso ezal afa benttod garkkepp attin E woy eza yeleezıtay nagara oothээz gıshos baaya.

⁴ Gallasa yezin tana kiitteezay oosa ta oothodayis beeziza. Oonkka oothodayis danda7oowa qammay yi7iza.

⁵ Taanii alamayid yezar alamayis poo7o» yeeгeeza.

⁶ Yesuusa yeya gi sa7a cutteeza. Fa cuchchayir laafa biitta laakithii ye urqqayir to7a athay aafa tızheeza.

⁷ Yeezii, «Yhanigii Salihoome giz teqintteez haatha ne aafa meecinttoba» yeeгeeza. (Salahoome guussay kiitintteeza guusii) Yeyi gıshos, athay yhanigii fa aafa meecinttii bi7ıttar maaqqeeza.

⁸ Athay shooritaynnee athay tiin woossodar be7eez asay, «yhayi bettii woossiza atha baasa?» yeeгeeza.

⁹ Pettii pettii asay, «yhayi eza» yeeгeeza.

Yhankkitay ma, «Wa77a, yhayi eza aazizapp attin eza baaya» yeeгeeza.

Zin athay, «Ee, tana» yeeгeeza.

¹⁰ Unttii eziko, «Yeezin ne aafay wayızii be7eenee?» yeeгii oyıceeza.

¹¹ E mahii, «Yesuusa giz athay xiqqa urqqa laakithii ta aafa tızhii, «Salihoome yhanigii ne aafa meecinttoba» yeeгin, taanii yhanigii meecinttii bi7ii atteeza» yeeгeeza.

¹² Unttii eziko, «E aba yenee?» yeegii oyiceeza. Athay, «Taanii erooya» yeegeeza.

Ferisaawe asay haneezibaza erodayis koyeeza

¹³ Unttii tiin to7a, zin yhatti be7eez atha Ferisaawitayiko kanggeeza.

¹⁴ Yesuusa urqqa laakithii athay aafa patheez gallasay maala gallasii.

¹⁵ Yeyi gishos, athay wayizii be7eezako Ferisaawe asay eza mahii oyiceeza. Athay untiko, «E ta aafate xiqqa urqqa tizheeza. Ta aafa meecinttii yhatti bi7iza» yeegeeza.

¹⁶ Ferisaawitaypp pettay pettay, «yhaya oothiez athay maala higge naagoowa gishos Xoossapp ye7ekkaya» yeegeeza.

Zin yhankkitay, «Nagaranchcho asii yhay garkk mallita wayizii oothodayis danda7ee?» yeegii woli gancce shaakintteeza.

¹⁷ Yeyi gishos, Ferisaawe asay athayiko, «E ne aafa bi7iseez gishos ne ebaz waagee?» yeegeeza. Athay, «E nabe» yeegeeza.

¹⁸ Ayihude halaqitay, e indatinnee ada xeezii oyicod gatho, athay tiin to7a maaqqeezannee yhatti E bi7izana ammanekaya.

¹⁹ Unttii e indatonnee e adayiko, «Yi <To7a maaqqii yelintteeza> giz yi na7ay yhaya? Yeezin, yhatti wayizii be7eenee?» yeegii oyiceeza.

²⁰ Eza yeleezitay, «yhayi nu na7a maaqqeezannee to7a maaqqii E yelintteezana nu eriza.

²¹ Zin yhatti E wayizii be7eezako ma e aafa oonii patheezako nuunii erooya. Eza oyicoytta. E fana ereez as maaqqeez gishos fabaz ododayis danda7iza» yeegeeza.

²² Eza yeleezitat yeya geezay Ayihuditayis yashitteez gishshosi. Abis giiko, Ayihuditay, Yesuusana E Kiristtoosa yeegii markkattiz asii yezako ye atha Ayihuditay Woosa keethapp bayi7odayis qofa acceeza.

²³ Eza yeleezitat, «E fana ereez asii; eza oyicoytta» yeegeezay yhaya.

²⁴ Yeyi gishos, to7a maaqqii yelintteez atha untii mahii xeezii, «Tuma ododayis Xoossa bonchoba; yha athay nagaranchcho maaqqizana nu eriza» yeegeeza.

²⁵ Athay mahii, «E nagaranchcho maaqqeezana, ta erooya. Taanii to7a maaqqeezannee e yhatti bi7izana aadda eriza» yeegeeza.

²⁶ Unttii mahii, «E nees ab ootheene? E ne aafa wayizii patheennee?» yeegeeza.

²⁷ E untiko, «Taanii yinttis odeeza, zin yi si7ibe7ekkaya. Abis maaqqii maaqqii si7odayis koyinnee? Yinttikka e tamaare maaqqodayis koyinee?» yeegeeza.

²⁸ Unttii eza cazhii, «Ne ye athay tamaare; nuunii Muse tamaare geeza.

²⁹ Xoossay Muses odeezana nuunii eriza, zin yha athay E anapp ye7eezakokka nu erooya» yeegeeza.

³⁰ Athay untiko, «E anapp ye7eezako yinttii eroozay malabaz, zin E ta aafa patheeza.

³¹ Xoossa bonchchizannee E koyiz baz oothiza atha Xooss si7eezapp attin nagara oothizita si7ooya.

³² Salo sa7a medhintteezaypp to7a maaqqii yelintteez as aafe patheezay oonkka baaya.

³³ Yha athay Xoossapp kiitinttekkazako pettibazikka oothodayis danda7ooya» yeegeeza.

³⁴ Unttii maaqqii, «Neenii nagarara yelinttii dicceezay nuna tamarssodayis koyinee?» yeegeeza. U eza Ayihuditay Woosa keethapp kesseeza.

Wozina to7atithi

³⁵ Yesuusa unttii atha bale kesseezana si7ii eza hellii, «As Na7a ne ammaninee?» yeegii oyceenza.

³⁶ Athay Yesuusako, «Godayyo, ta Eza ammanod garkk E oonoo? Taas odooye?» yeegeeza.

³⁷ Yesuusa athayko, «Ne Eza be7eeza; yha neer odintizay Eza» yeegeeza.

³⁸ Athay mahii, «Godayyo, ta ammaniza» yeegii Yesuusas goynniza.

³⁹ Yesuusa, «To7itay be7adgarkk bi7izitay to7oday garkk pirdodayis yha alame ta ye7eeza» yeegeeza.

⁴⁰ Ezar yezi xiqqa Ferisaawe asitay yeya si7ii, «Nu to7annee?» yeegii woli oycicheeza.

⁴¹ Yesuusa, «yi to7ita maaqqeezako yinttis nagara baaya. Zin yhatti yi bi7iza giz gishos yi, yi nagarara yi yeza» yeegeeza.

10

Henggizayanee e durita

¹ Yesuusa, «Taani yinttis turo odiza; dur kale gancce pengere baazin hara oger geliz oonkka kayizonnee paanno.

² Yeya maaqqozin pengere gelizay durita heengizaya.

³ Penge naagizay ezisi penga dooyiza; duritaykka E qaala si7iza. E fa durita u sunthayir sunthayir xeeqiza; untan kaalithii bale kessiza.

⁴ E oothiez faasita bale kesseezaypp guye u tiina tiina yedhdhiza. Untikka E qaala eriza gishos Eza kaalliza.

⁵ Hara as qaala untii eroowa gishos eep haakkizapp attin E lassa kaallooya» yeegeeza.

⁶ Yesuusa untis yha aazisa odeeza, abi odeezakko untii akaakekkaya.

⁷ Mahii Yesuusa untiko, «Taanii yinttis turo odiza; ta duritayis penge.

⁸ Taapp tiini ye7eez ubbitay kayizonnee paanno, yeya maaqqadar duritay untan si7ibe7ekkaya.

⁹ Pengey tana; ta baggar geliza oonkka attoda. E ta baggar gelodannee kezoda; lo77o heenggintiz ago demmada.

¹⁰ Kayzo kasttodayis, shukkodaysinnee dhabisodayis yi7izap attin harabazis ye7ooya. Taanii untis de7o yezod garkkerannee kumii fucod garkk ye7eeza.

¹¹ «Taanii lo77o henthanchcho; lo77o henthanchchay fa duritay gishos fa shemppo aathii inggiza.

¹² Kera heenggiz as duritay godanne henthanchcho baazay gishos fuge yi7iko bi7ii durita ashii hali7iza. Yeyi gishos, suudhume durita aykkii laaliza.

¹³ Kera heenggizay miishes heenggiz gishonnee duritaybaz eza qofisoowa gishos durita ashii laaliza.

14-15 «Taanii lo77o henthanchcho. Ta Aday tana erizay gark taankka ta Ada eriza. Yey garkkekka, ta ta durita eriza; ta duritaykka tana eriza. Taanii ta duritay gishos ta shemppo aathii inggiza.

16 Yha wudayid baa hara duritay taas yeza. Taanii unttanakka ko7odayis beeziza. Unttii ta qaala si7oda; unttii pettii wude maaqqada; henthanchchaykka petta.

17 «Taanii ta shemppo aathii inggii mahii ekkiz gishos ta Aday tana doseeza.

18 Ta dosiza ta shemppo aathii inggizaypp attin taapp oonkka ekkenna. Ta ta shemppo aathii im-madayisinnee mahii ekkodayis silixxaanee taas yeza. Taanii oothod garkk ta Aday tana kiitteezay yhaya» yeegeeza.

19 Yeya E geez gishos Ayihuditay gancce maakka shaakotethii medhintteeza.

20 Unttapp gaame baggay, «Ezar tuna ayyana yeza! E eeyiza! E giz baz abis si7inee?» yeegeeza.

21 Yhankkitay ma, «Xalahe aykkeez as yhay garkk odinttooya. Tuna ayyana to7a aafe beezodayis danda7inee?» yeegeeza.

Yesuusa As Na7a

22 Yerusalaame Xoossa Keethi orotheez gallasitay bonchchiza baale helleeza; ye wode sa7a barigo.

23 Yesuusa Xoossa Keethi Solomone baaranddar yuuyiza.

24 Ayihuditay Yesuusa lanqqayid shiiqqii eqqii, «Neenii nuna ayide hellodayis sidher gaddodee? Neenii Kiristtoosa maaqqiko ane nuus geeshshii odoba» yeegeeza.

²⁵ Yesuusa maaqqii untiko, «Taanii yinttis odeeza; zin yi tana ammanooya. Taanii ta Aday taasi inggeez mawuter oothiza oosay tabaz markkattiza.

²⁶ Zin taanii yinttis odeezay garkk yi ta dure maaqqekka gishos ammanooya.

²⁷ Ta duritay ta qaala si7oda. Ta untan eriza; untikka tana kaalliza.

²⁸ Taanii untis medhina de7o inggiza; untii ubbarakka dhabaamii. Oonkka ta kushep untan bonqqii ekkodayis danda7ooya.

²⁹ Untan taasi inggeez ta Aday ubbap aadhiza oonkka ta Aday kushep untan bonqqii ekkodayis danda7ooya.

³⁰ Taanee ta Aday petto» yeegeeza.

³¹ Ayihuditay Yesuusa shocodayis maakka shuchchi dentheeza.

³² Yesuusa untiko, «Taanii oothod garkk ta Aday taasi inggeez gaame lo77o oosita yinttan oothii beeziza. Yeyititaypp aayay gishos tana shuchchar shocodayis koyinnee?» yeegeeza.

³³ Ayihuditay mahii, «Nuunii nena ne lo77o ooso gishos shuchchar shocodayis koyooya. Zin neenii Xooss cazheez gishonnee as maaqqitar ne nena Xooss giz gishshosi» yeegeeza.

³⁴ Yesuusa mahii, «Geeshsha Maxaafayid Xoossay, «Yi Xoossita» geezay xaafinttekkasa?

³⁵ Geeshsha Maxaafay medhinas laaminttaam-mii. Xoossay fa qaala inggeez asita, «Xoossita» gi xeeigiko,

³⁶ Ta tana Xooss na7a geezayis, Aday maraxii yha alame kiitteez tana Xooss Na7a wayizii «Xoossa ne cazhiza» yeegee?

³⁷ Taanii ta Aday oothizana oothaam ixixiko tana ammanippatte.

³⁸ Zin taanii oothizabaz maaqqiko yinttii tana ammanaam ixixikokka, ta Aday taar yezannee taakka ta Adayir yezana yi erod garkk ta oosa ammanoytta» yeegeeza.

³⁹ Maakka untii eza aykkodayis koyeeza, zin E untapp buuttii kezeeza.

⁴⁰ Waannisa tiin xammaqiza aqa, Yorddanoosa borikap seko pino Yesuusa piinggii ezayid gam7eeza.

⁴¹ Gaame asay Yesuusako yi7ii, «Waannisa malata oothekkaya, zin E yha athayabaz odeezbazay ub-bay tuma» yeegeeza.

⁴² Ezayid gaame asay Yesuusa ammaneeza.

11

Alaazara yhayiqo

¹ Bitana heera Alaazara giz pettii athay harggintteeza. Bitana Mayiramirannee I mishshitti Marttara yeza heera.

² Mayrama Goday toka shitto tizheez fa bi-nanayirakka e toka ucceezanno. Harggintteezay I isha Alaazara.

³ Yey gishos, mishunthikka, «Godayyo, ne dosizay harggintteeza» gi Yesuusako azazeeza.

⁴ Yesuusa yeya si7ii «Yha harggay, Xoossaynnee e Na7ay bonchchnttod garkkepp attin yhayiqos helithiz harige baaya» yeegeeza.

⁵ Yesuusa Martta, I mishshitonnee Alaazara qaadhiza.

⁶ Zin Alaazare harggintteeza gin Yesuusa si7ii fa yeza aqo nam77ii gallas gam7eeza.

⁷ Yeypp guye, Yesuusa fa taaaritayiko, «Mahii Yihuda biitta wolla yhammada» yeegeeza.

⁸ E taaaritay mahii, «Asitamaarayyo, xiqqa wodepp tiin Ayihuditay nena shuchchar shocci wodhodayis koyeezannee; yhattekka gede yhammadee?» yeegeeza.

⁹ Yesuusa, «Pettii gallasa gancce taphpho nam77ii saate baasannee? Gallas yedhdhiz asii yha alame poo7a bi7iza gishos dhubinttaamii.

¹⁰ Zin gamma yedhdhiz oonkka poo7o baazay gishos dhubinttiza» yeegeeza.

¹¹ Yesuusa yeya geezaypp guye untiko, «Nu qadhdhiza Alaazare gentteeza, zin eza denthodayis taanii yhammada» yeegeeza.

¹² E taaaritay mahii, «Godayyo, E gentteezbaz maaqqiko eesi lo77oda» yeegeeza.

¹³ Yesuusa Alaazare yhayqqeezay gishos yeya odeeza, zin untisi cer gentta aaziza.

¹⁴ Yeyi gishos, Yesuusa qoncisii untiko, «Alaazare yhayqqeeza.

¹⁵ Yi ammanod garkk taanii ye aqayid baa maaqqeezayis yi gishos tana ufayssiza. An yedhdhoytta; eziko wolla yhammada» yeegeeza.

¹⁶ Yeypp guye, Didimoosa ginttintiz Toomaasa fa lagge taaaritayiko, «Asitamaarayir yhayqqodayis nuukka wolla yhammada» yeegeeza.

Yesuusa dendonnee de7o

¹⁷ Yesuusa Bitaana hellodar Alaazare moogintin oyddii gallas maaqqeeza.

¹⁸ Bitaane Yerusallemepp hayidzii kilo mitire garkk haakkiza.

19 Gaame Ayihuditay Marttanee Mayramo u ishay yhayqqeezayis minthathodayis ye7eeza.

20 Martta Yesuusa ye7eezana si7ii eza mokko-dayis kezeeza, zin Mayrama keetha atteeza.

21 Martta Yesuusako, «Godayyo, neenii yhaydda yeza maaqqeezako ta ishay yhayqqaam.

22 Zin yhatti maaqqikokka neenii woossiza baz Xoossay nees immadana taanii eriza» yeegeeza.

23 Yesuusa, «Ne ishay yhayiqopp dendoda» yeegeeza.

24 Martta eziko, «Wurssith gallas E yhayiqopp dendodana ta eriza» yeegeeza.

25 Yesuusa iziko, «Taanii dendonnee de7o; tana ammaniza oonkka yhayqqikokka de7or yezoda.

26 Ma de7or yezayinnee tana ammaniza oonkka yhayqqaam. Yeya ne ammaninee?» yeegeeza.

27 Martta mahii, «Godayoo, ee taanii ammaniza! Neenii Xooss Na7a, alame ye7odayis yeza Kiristoosa maaqqizana taanii ammaniza» yeegeeza.

28 Martta yeya geezaypp guye, yhanigii fa mishshitto geema xegii, «Asitamaaray yi7ii nena koyiza» yeegeeza.

29 Mayrama yeya si7ii ellisii denddii Yesuusako yhanigeeza.

30 Ye wode Yesuusa Martta eza Mokkeez aqo yeza; haga heera hellekkaya.

31 Mayramo minthathitar izir kara yezi Ayihuditay, iza denddii ellisii bale kezeezaya bi7ii, du-ufo yhanigii yeekkodayis haniza aazin izo kaallii kezeeza.

³² Mayrama Yesuusa yeza aqa yhanigii eza bi7ii e tokayil afa guphingii, «Godayyo, neenii yhaydda yeza maaqqeezako ta ishay yhayqqaamizin» yeegeeza.

³³ Yesuusa Mayiraminnee iir yez, Ayihuditay yeekkizana bi7ii, fa wozinar iita micinttii,

³⁴ «Aba moogeene?» yeeгии oyicin, «Godayyo, yi7ii bo7oba» yeeгии maheeza.

³⁵ Yesuusa afuxeeza.

³⁶ Yeyi gishos, Ayihuditay, «E Alaazara ab garkk qadhdhizako bo7oytta» yeegeeza.

³⁷ Zin untapp pettay pettay, «yhayi to7a bi7iseezay yha athay yhayqqaam garkk oothodayis danda7aamonee?» yeegeeza.

Yesuusa Alaazara yhayiqopp dentheeza

³⁸ Maakka Yesuusa micinttii, Alaazare moogintteez duufa qitteeza. Ye duufay shuchchar gordintteez komi7o.

³⁹ Yesuusa, «Shuchcha denthoytta» yeeгии azazeeza.

Martta, «Godayyo, E yhayqqeezaypp oyddii galas maaqqeez gishos yhatti zeeqqoda» yeegeeza.

⁴⁰ Yesuusa Marttako, «Ne ammanizabaz maaqqiko Xooss bonchcho be7adana taanii nees odekkasa?» yeegeeza.

⁴¹ Unttii shuchcha denthin Yesuusa salo pude bi7ii, «adayyo, tana ne si7eez gishos nena galatiza.

⁴² Ne ubba wode tana si7izana taanii eriza. Zin yhaydda eqqeez asay neenii tana azazeezana ammanoday garkk taanii u gishos yhaya giza» yeegeeza.

⁴³ Yesuusa yeya geezaypp guye, fa qaala dhoqi uddii, «Alaazara, yhana kezoba!» yeegeeza.

⁴⁴ Yhayqqeez athay zidhithatir kushaynnee tokay shalor acinttii yezin e aafe baggay goozintteezin duufaypp kezeeza. Yesuusa untan, «Billoytta! Yhamme goytta!» yeegeeza.

Kiristtoosal afa tobbeeza

(Mat. 26:1-5; Mar. 14:1-2; Luq. 22:1-2)

⁴⁵ Yeyi gishos, Mayramiko ye7eez Ayihuditaypp gaamitay Yesuusa ootheezana bi7ii eza ammaneeza.

⁴⁶ Zin untapp pettay pettay Ferisaawitayiko yhanigii Yesuusa ootheezana untisi odeeza.

⁴⁷ Yeypp guye, qeese halaqitayinnee Ferisaawe asay shanggo shiishii, «Yha athay gaame malla oothizi gishos nu abi udoo?

⁴⁸ Nuunii eza si77i gi ashshiko as ubbay eza amanoda. Ma Oroome biitta asay yi7ii nu Xoossa Karannee nu gada dhabisoda» yeegeeza.

⁴⁹ Untapp pettay Qayyaafa gizayi, ye laythi qeese halaqa maaqqeezay, «Yi abikka erooya!

⁵⁰ Asay ubbitay dhabizaypp as ubbay gishos pettii as yhayqqizay lo77o maaqqizana yi eroosa?» yeegeeza.

⁵¹ E yeya paapp geekkaya. Zin (ye laythi qeese halaqa maaqqiz gishos Yesuusa Ayihude as gishos yhayqqodayis beezizana tinbbite odeeza.

⁵² Ma Yesuusa Ayihude as aaddas baazin laalinttii yezi Xoossa asii ubba wollal shiishodayisnee pettii asii oothodayis yhayqqoda.)

⁵³ Ye gallasapp aykkii untii eza wodhodayis tobbeeza.

⁵⁴ Yey gishos, Yesuusa Ayihuditay gancce geeshshar yuuyekkaya. Zin liizho deniba lanqqe

yezi Efreeme heera yhanigeeza. Fa tamaritayir ye aqayid gam7eeza.

⁵⁵ Ayihuditay bonchchiza Paaziqa gallasay uuk-keeza. Ma gaame asay fana qashodayis Paaziqa bonchchiza gallasay hellodaypp tiina ye biittapp Yerusalaame qitteeza.

⁵⁶ Unttii Xoossa Keetha eqqii Yesuusa yi7itha naagiza gishos «Abi qoppee? Yesuusa baala bonchchodayis ye7oosa?» yeegii pettay petta oy-iceeza.

⁵⁷ Qeese halaqitayinnee Ferisaawe asay Yesuusa aykkodayis, E yezabessa eriza oonkka paasi odod garkk azazeeza.

12

Yesuusana shitto tizheez asito
(Mat. 26:6-13; Mar. 14:3-9)

¹ Paaziqa bonchchiza gallasipp usuppun gallas tiinattii, Yesuusa yhayiqopp dentheez Alaazare yezi heera, Bitanaa qiteeza.

² Ye aqayid unttaa ees kaho giigiseeza. Alaazare Yesuuser wollal muntal betteezin Martta untan mukkiza.

³ Mayrama narddoosa giz gaame al7o geesh shitto ki7i Yesuusa toka tizheeza. Fa binnannayir e toka ucceeza; keetha ubbay shitto sawor tonkki geeza.

⁴ Zin Yesuusa tamaritaypp pettay, Yesuusa aathii inggoday, Asiqoroto Yihuda,

⁵ «Abis yha shittay hayidzii xeet dinnare bayizinttii, miishay manqqitayis ingginttoosa?» yeegeeza.

⁶ (E kayzo maaqqeez gishos yeya geezapp at-tin manqqitayis qadhinttii geekkaya. E miishe quribo aykkiza maaqqeez gishos ubba wode eza-ypp paas ekkiza.)

⁷ Yesuusa, «Iza paas yeza baz ta moogo gallasis minjjeez gishos izo ashii ashshoytta.

⁸ Manqqitay ubba wode yinttar yezoda, zin taanii ubba wode yinttar yezaamii» yeegeeza.

⁹ Ye wode gaame asay Yesuusa Bitaaana yezana si7ii gede yhanigeeza. Unttii Yesuusa aadda baazin E yhayiqopp dentheez Alaazarakka be7adayis yhanigeeza.

¹⁰ Yeyi gishos, qeese halaqitay Alaazarakka ma wodhodayis tobbeeza.

¹¹ Abis giiko, Alaazara baggar gaame Ayihuditay untan ixzii Yesuusana ammaniza.

*Yesuusa bonchchor Yerusalaame geleeza
(Mat. 21:1-11; Mar. 11:1-11; Luq. 19:28-40)*

¹² Wonttitha gallas Paaziqa bonchchiza aqo ye7eez woaya Yesuusa Yerusalaame yhanigiza si7ii,

¹³ Zambba haye ekkii eza morkodayis kezeeza.
Fa qaala dhoqqi udii,
«Hosaana! Xoossay galatintto!
Goday sunthar yi7izay anjjintto!
Xoossa Isreele Kaattay anjjintto!»
yeegeeza.

¹⁴⁻¹⁵ Geeshsha Maxaafayid,
«Xiyone katamas, yashittippe!
Yeezako, ne Kaatay hare na7al afa bettii
yi7iza»
giintintteezay garkk Yesuusa hare na7a dengii
eza toggeeza.

¹⁶ Yesuusa tamaritay yeya tiin akaakekaya. Zin Yesuusa bonchchintteyaypp guye untii yeya ubba akaakeeza. Yeyi ubbay geeshsha Maxaafay geezay gark haneenza.

¹⁷ Yesuusa Alaazara duufoppi xeezii, yhay-iqoppi dentheez wode ezar yez gaame asay Yesuusa oosa markkatteeza.

¹⁸ Gaame asay eza makkodayis kezeezay, E ye mallita ootheezana si7eez gishshosii.

¹⁹ Yey gishos, Ferisaawe asay pettay peetayiko, «Nu abkka oothodayis danda7ooza bo7oytta; woya ubbay eza kaalliza» yeegeeza.

²⁰ Paaziqa bonchchiza gallas goynnodayis Yerusalaame yhanigeezitay gancce pettii pettii Girike asay yeza.

²¹ Untii Galila biitta Beetesayda katamapi ye7eez Filphoosakko yhanigii, «Godayyo, nuunii Yesuusa be7adayis koyiza» yeezii woosseeza.

²² Filphoosa yhanigii Indiraases odin nam7itay yhanigii, Yesuusas odeeza.

²³ Yesuusa untiko, «Asi Na7ay, bonchchinttiza wode helleeza.

²⁴ Taanii yinttis turo odiza; pettii gistte aafe bi-itta gancce wodhdhii wooqqekka attiko fa aaddas attiza. Zin ye gistte aafay wooqqiko gaame aafe aafiza.

²⁵ Fa shemppo qadhdhiza oonkka dhabisiza; fa shemppo yha alamayid ixkiza oonkka medhinas de7os nagisiza.

²⁶ Taanii yeza aqo taar yezod garkk taasi oothodayis koyiz oonkka tana kaallodayis beeziza. Taas oothiza oonakka ta Aday bonchchoda.

Yesuusa fa yhayiqo bagga tiinatii odeeza

27 «Yhatti ta shemppay gaame un77initeeza; yeezin waago? «Ta Adayyo, tana yha saataypp ashshooyee» yeego? Wa77a, taanii ye7eezay meto ekkodayisii.

28 Ta Adayyo, ne suntha bonchchoba» yeegeeza.

Yeypp guye salopp, «Taanii ta suntha bonchcheeza; gujjika bonchchoda» yeegizi qaala ye7eeza.

29 Ye aqayid eqqeez gaame asay ye qaala si7ii, «Yeyi dada» yeegeeza.

Yhankkitay ma, «Kiitanchchay eesi odeeza» yeegeeza.

30 Yesuusa mahii untiko, «Yha qaalay yi gishos ye7eezaypp attin ta gishos baaya.

31 Yha alamay pirddinttiza woday yhatte; yha alama aqisizana yhatti bale oloda.

32 Ma taanii sa7app dhoqqi geez wode asi ubba taako ko7oda» yeegeeza.

33 E yeya geezay ab garkk yhayiqo yhayqqo-dazako untis erisodayisii.

34 Gaame asay mahii, «Nu higgay Kiristtoosa medhinas yezana odiza. Yeezin, neenii waagii, As Na7ay dhoqi goddayis beeziza gee? E, As Na7ay oonoo?» yeegeeza.

35 Yesuusa, «Poo7ay yinttar xiqqa wode gam7oda. Yinttis dhumaam garkk poo7o yezin, poo7ayir yedhdhoytta. Dhumar yedhdhiz as ana yhanigizako erooya.

36 Poo7o na7ita maaqqad garkk poo7o yezin poo7ana ammanoytta» yeegeeza. Yesuusa yeya odeezayp guye yhanggii untapp geemmeeza.

Ayihuditay ammanekaya

³⁷ E yey garkk mallita u tiinayid oothinkka ammanekkaya.

³⁸ Nabe Isayaasa,
«Godayyo, nu markketithi oonii ammaneennee?
Goday wolqqay oossi beentteennee?»
Geezay tuma maaqqaday garkk untii eza ammanekkaya.

³⁹⁻⁴⁰ Maakka Isayaasa,
«U aafay be7aam garkk,
u wozinay akaakam garkk,
untii Xoossiko maaqqin, E untan pathaamay
garkk,
Xoossay u aafa too7iseeza.

U wozina miintheeza»
geez gishos untii ammanodayis danda7ekkaya.

⁴¹ Isayaasa yeya geezay, Yesuusa bonchcho
be7eez gishonnee ebaz odeeza.

⁴² Maaqqikokka, Ayihuditay halaqitayppekka
gaamitay Yesuusana ammaneeza. Zin Ferisaawe
asitay fana Ayihuditay Woosa keethap kessiza gi
yashitteez gishos ammaneez gi geesha markkat-
tekkaya.

⁴³ Yeya untii ootheezay, Xoossar erinttodaypp
aathii asar erinttodana doseez gishshosi.

⁴⁴ Yesuusa fa qaala dhoqi uddii, «Tana amman-
iza oonkka tana azazeezanakka ammaneezaypp
attin tana aadda ammanooya.

⁴⁵ Tana bi7iza oonkka tana azazeezanakka
bi7iza.

⁴⁶ Tana ammaniza ubbay dhuma gance
yezaam garkk poo7o maaqqii alame taanii
ye7eeza.

⁴⁷ Ta qaala si7ii kiitinttoowa oonakka taanii pirddaamii. Abis giiko, taanii alame ashshodayis ye7eezaypp attin pirddodayis ye7ekkaya.

⁴⁸ Tana ixxizannee ta qaala ekkowa oonakka pirddizay yeza. Taanii odeez qaalay wurssith gallas ye atha pirddoda.

⁴⁹ Abis giiko, taanii yeya taapp odekkaya, zin tana kiitteez ta Aday taanii ab godazakonne ab ododazako azazeeza.

⁵⁰ Ma e kiitay medhinas de7o maaqqizana taanii eriza. Yeyi gishos, taanii odizay ta Aday tana odoba geezana» yeegeeza.

13

Yesuusa fa tamaritay toka meecceeza

¹ Paaziqa bonchchiza gallasay hellodaypp ti-inatii yha alame ashshii Adayiko yhanigiza wode helleezana Yesuusa ereeza. Yha alamayid yez faasita ubba wode doseez; folo siiqorakka untan doseeza.

² Yesuusara e tamaritayir wolla kaho maadar Xalahe Simoona na7a Asiqoroto Yihuda Yesuusa aathii immadaygarkk e wozina gancce iita qofa gaddeeza.

³ Yesuusas Aday ubba baz e kushe gaddeezana, E Xoossapp ye7eezanannee maaqqii eziko yham-madana ereeza.

⁴ Yesuusa kaho mi denddii fa guulantta qaarii gaddii, pooxa fa xeessa dancceeza.

⁵ Yeypp guye, gabate gancce haath qoli, fa tamaritay toke meecceeza; ma fa xeessayida dancceez pooxayir ucceeza.

6 Yesuusa Simoon Phixiroosako ye7odar Phixiroosa, «Godayyo, ne ta toka meeccodee?» yeegeeza.

7 Yesuusa mahii eziko, «Taanii oothizana ne yhatti erooya, zin guyepp akaakoda» yeegeeza.

8 Yeezin, Phixiroosa, «Ne ta toka ubbarakka meeccodayis danda7ooya» yeegeeza.

Yesuusa eziko, «Taanii ne toke meeccekka attiko neesinnee taasi pettipetithii baaya» yeegeeza.

9 Phixiroosa Yesuusako, «Godayyo, yeezako, ta tokay aadda baazin ta kushannee ta omma meec-coba» yeegeeza.

10 Yesuusa mahii, «Galla meecintteez oonkka tokepp hara baz meecinttodayis beezooya; e ub-bay geeshshii. Yi geeshshii, zin ubba asii geeshshii baaya» yeegeeza.

11 Yesuusa fana aathii immad athay oonazako eriza gishos «Yi ubbitay geeshshii baaya» yeegeeza.

12 U toke meecceezaypp guye Yesuusa fa afile mahii ma77eeza. Maaqqii muntal afa bettii unt-tiko, «Taanii yinttis ootheezana akaakinee?

13 Yi tana asitamaarennee Goda giza; taanii yi giza maaqqeez gishos lo77o geeza.

14 Taanii yinttis Godanne asitamaare maaqqitar yi toke meecchiko yinttika pettay pettayis yhay garkk oothodayis beeziza.

15 Yikkee, taanii yinttis ootheezay garkk yint-tikka oothod garkk yinttis aaziso maaqqeeza.

16 Taanii yinttis turo odiza; ayllay fa godaypp, kiitintteezay kiitteezaypp aadhooya.

17 Yi yeya erii oothizabaz maaqqiko anjjint-teezita.

¹⁸ «Taanii yinttan ubbita gooya; taanii marax-eezita ta eriza. Zin geeshsha Maxaafayid, «Taapp meezay taal afa fa toka dentheeza» ginttintizay tuma maaqqodayis beeziza.

¹⁹ Taanii Tana maaqqeezana yi ammanod garkk yeyi hanodaypp tiinattii yinttis odiza.

²⁰ Taanii yinttis turo odiza; taanii kiitteez oon-akka mukkiza athay tana mukkiza. Tana mukkiz oonkka tana azazeezana mukkiza» yeegeeza.

Yesuusa fana aathii immaday oonazako tiinattii odeeza

(Mat. 26:20-25; Mar. 14:17-21; Luq. 22:21-23)

²¹ Yesuusa yeya odeezaypp guye fa wozinar gaame un77inttii, «Taanii yinttis turo odiza; tana yinttip pettay aathii immada» gi qonccisii odeeza.

²² E o bagga odizako e tamaaritayis erinttaam ixxin pettay petta be7eeza.

²³ E tamaaritaypp pettay, Yesuus dosizay, Yesu-
usa kale betteeza.

²⁴ Yeyi gishos, Simoon Phixiroosa eza qami7ottii, «E oona gizako an oyicoba» yeegeeza.

²⁵ Yeyi gishos, ye tamaaray Yesuusako haye kale shiiqii, «Godayyo, E oonoo?» yeegeeza.

²⁶ Yesuusa mahii, «Taanii soollo dushii bars-sizaya» yeegeeza. Ma soollo duuthii ekkii, dushii, Simoon na7a Asiqoroto Yihuda barsseeza.

²⁷ Yihudana soollo baareezaypp guye Xalahe ellisii Yihuda gancce geleeza. Yesuusa eeko, «Ne oothodayis qoppeezanno ellisii oothoba» yeegeeza.

²⁸ Zin munttal afa betteezitaaypp oonkka Yesu-
usa yeya abis geezako erekkaya.

²⁹ Yihuda miishe aykkizi gishos e tamaaritaypp pettay pettay Yesuusa e, «Paaziqa bonchchiza gal-lasis paasi koshshiza baz wonggoba woy manqqi-tayis muxaata inggoba geeza» yeegii qoppeeza.

³⁰ Yihuda soollo baareezangarkk izira bale kezeeza. Ye wode sa7a qamma.

Orothi kiita

³¹ Yihuda bale kezeezaypp guye, Yesuusa, «Yhatti As Na7ay bonchchintteeza; Xoossaykka e baggar bonchchintteeza.

³² Xoossay e baggar bonchchinttiko E fa ommas As Na7a bonchchoda; ma E yeya ellis oothoda.

³³ Ta na7untho, taanii yinttar gaame wode gam7aamii. Yi tana koyoda, zin taanii Ayihu-ditayis odeezan garkk, «Yi taanii yhanigiza aqo yhammadayis danda7ooya»

³⁴ Taanii yinttis inggiz orothi kiitay yhaya; pet-tay petta qadhdhoytta. Taanii yinttan qadhd-heelzay garkk yi pettay petta qadhdhodayis beez-iza.

³⁵ Yi pettay pettayira dosinttiko yi ta tamaare maaqqizana asii ubbay eroda» yeegeeza.

Phixiroosa kaddodana Yesuusa tiinattii odeeza (Mat. 26:31-35; Mar. 14:27-31; Luq. 22:31-34)

³⁶ Simoon Phixiroosa Yesuusako, «Godayyo, ne ana yhanigee?» yeegeeza.

Yesuusa mahii, «Taanii yhanigiza aqo neenii yhatti kaallodayis danda7ooya, zin guyepp tana kaalloda» yeegeeza.

³⁷ Phixiroosa, «Godayyo, taanii nena yhatti kaallodayis abis danda7oosa? Taanii ne gishos yhayqqodayis giig betteeza» yeegeeza.

³⁸ Yesuusa mahii, «Ta gishos yhayqqodayis tuma giig betteennee? Taanii nees turo odiza; shugula uukkodaypp tiini neenii tana hayidzii tok kad-doda» yeegeeza.

14

Yesuusa Adayko kanggiza oge

¹ Yesuusa fa tamaaritayiko, «Yi wozinay un77inttipe, Xooss ammanoytta, tanakka ammanoytta.

² Ta Aday kara gaame aqo yeza. Taanii yinttis bessi giigisodayis yhanigiza. Yeya maaqqekkazako taanii yinttis ododizin.

³ Taanii yhanigii bessi giigiseezaypp guye taanii yeza aqo yi yezod garkk maaqqii yi7ii yinttan taako kanggoda.

⁴ Yi taanii yhanigiza aqo kanggiz oge yi eriza» yeegeeza.

⁵ Yeezin, Toomaasa, «Godayyo, neenii yhanigiza aqo nuunii erooya; oga wayizii erodayis danda7odee?» yeegeeza.

⁶ Yesuusa mahii, «Oge, tumaynnee de7o tana. Ta baggar maaqqaam ixiko oonkka ta Adayko yhammadayis danda7ooya.

⁷ Yi tana eriza baz maaqqeezako, ta Adakka eroda. Zin yhaypp aykkii yi eza erizanee eza be77eeza» yeegeeza.

⁸ Filphoosa Yesuusako, «Godayyo, Ada nuna beezoba; yeyi nuus gidoda» yeegeeza.

⁹ Yesuusa mahii, «Taanii yhaygarkk wode yinttar yeezinka tana eroosa? Tana be7eez athay Adakka be7eeza. Yeezin, neenii waagii, «Ada nuna beezoooyee» gee?

¹⁰ Taanii Adayir yezannee Adaykka taar yezana neenii ammanoosannee? Taanii yinttis odiz qaala taanii taapp odooya, zin taar yeza Aday fa ootho oothiza.

¹¹ Taanii Adayir yezannee Adaykka taar yezana yi ammanoytta. Yeya ammanaamixiko ta ootheez malla bazitayil tana ammanoytta.

¹² «Taanii yinttis turo odiza; tana ammaniza athay taanii oothiza ooso oothod. Taanii Adayko yhanigiza gishos tana ammaniza oonkka yhaypp aadhiz oosita oothoda.

¹³ Aday Na7ay baggar bonchchnttod garkk ta sunthar yi woossiza ubbita ta yinttis oothoda.

¹⁴ Ta sunthar ababazikka yi oyiciko ta yinttis oothoda.

Yesuusa geeshsha Ayyana immadayis qaala geleeza

¹⁵ «Yi tana qadhiko ta kiita naagoda.

¹⁶ Taanii Ada woossoda; yinttar medhinas yezod garkk minthathiza yinttis immada.

¹⁷ Yha alame asay eza be7ekkazay gishonnee eroowa gishos eza ekkodayis danda7ooya tuma Ayyana. Zin E yinttar yeza gishonnee yi gancce yezod gishos yi eza eroda.

¹⁸ «Taanii yinttan inda ade baa na7a garkk yi aadda ashshaamii; maaqqii yinttiko ye7oda.

¹⁹ Xiqqa wodepp guye alamay tana mahii be7enna, zin yi be7ada. Taanii de7or yeza gishos yinttika de7or yessada.

²⁰ Taanii ta Adayir, yi taar, ma taanii yinttar yezana yi ye gallas eroda.

21 «Ta kiita ekkii naagizay tana qaadhdhiza. Tana qadhdhizana ta Adaykka qaadhdhiza; taankka eza qadhdhiza; taanii eesi benttoda» yeegeeza.

22 Asiqoroto Yihuda baa yhankko Yihuda Yesu-usako, «Godayyo, neenii wayizii alamayis baazin nuus nena beezodee?» yeegeeza.

23 Yesuusa mahii, «Tana qadhdhiza oonkka ta qaalayis kiittinttoda. Ta Aday eza qadhdhoda. Ma ta Adayira taara eziko yi7ii ezar yezoda.

24 Tana dosowa oonkka ta qaalayis kiittinttooya. Yi si7iz qaalay tana kiitteez Aday bazapp attin tabaz baaya.»

25 «Taanii yinttar yhatti yezar yeya yinttis odeeza.

26 Zin Aday ta sunthar kiittoda minthathiza geesha Ayyanay, yinttan ubba baz tamarssoda. Taanii yinttis odeez ubba E yinttan hassayisoda.

27 Sarotithi yinttis ashshoda. Taanii ta sarotitha yinttis immada. Ta ingiz sarotithay alamay inggiz sarotithay garkk baaya. Yeyi gishos, un77intippete, yashittipate.

28 «Taanii yhammad, maaqqii yinttiko ye7oda» geezana yi si7eeza. Yi tana tuma dosizibaz maaqqeezako ta Aday taapp aadhiz gishos taanii eziko yhanigizayid yi ufayttoda.

29 Yeyi hanodar yi ammanod garkk yeyi hanekkazin tiinatii taanii yinttis odeeza.

30 Yha alama aqisizay yi7iza gishos yhaypp guye yinttar gaame odinttaamii. Tana E abikka ootho-dayis danda7ooya.

31 Zin taanii Ada qadhdhizana alamay erod garkk ta Aday tana azazeezana ubba oothiza. Dendoytta; yhaypp wolla yhammada.

15

Woynnee turas ubbay Yesuusa

¹ «Taanii woynnes tuma ubba. Oothizay ta Ada.

² Taal afa yezii aafe aafowa shaqo ubba E kariza. Aafiz shaqo tiinaasaypp aadhii aafoday garkk ye shaqa E giigisoda.

³ Taanii yinttis odeez qaalay gishos yi geeshshita.

⁴ Taar yezoytta; taankka yinttar yezoda. Woynnee shaqay ubbayir yezekka attiko ye shaqay fa aaddas aafe aafodayis danda7ooya. Yey garkkeka, yinttika taal yezekka attiko aafe aafodayis danda7ooya.

⁵ «Taanii woynnes ubba; yi shaqqita. Taar yezizaynnnee taanii ezar yezizay, E gaame aafe aafoda. Ta baazin yi yi ubbas abikka oothodayis danda7ooya.

⁶ Taar yezoowazay shaqo garkk bale olinttii meloda. Unttan shiishii tama oloda, eexoda.

⁷ Yi taar yeziko, ta qaalaykka yinttar yeziko, yi koyiz baz abi maaqqikokka woosoytta; yi ekkoda.

⁸ Yi gaame aafe aafikonne ta tamaare maaqqiko, yeyid ta Aday bonchchnttoda.

⁹ Aday tana qadhdhizay garkk taankka yinttan qadhdhiza; ta siiqayir yezoytta.

¹⁰ Taanii ta Aday kiita naagii e siiqayid yezeezay mgarkk yinttika ta kiita naagiko ta siiqayid yezoda.

¹¹ «Ta ufayssay yinttar maaqqaday garkkennee yi ufayssay folo maaqqad garkk taanii yinttis yeya odeeza.

¹² Ta kiitay yhaya; taanii yinttan qadhdheezay garkk yinttikka woli woli qadhdhoytta.

¹³ Fa shemppo fa laggayis aathii inggizaypp aadhiz dama siiqo baaya.

¹⁴ Taanii yinttan kiitteez ubbita yi oothiko yi ta dabbita.

¹⁵ «Aylle fa goday oothizabaz eroowa gishos taanii yinttan yhaypp guye ayllita gamii. Zin ta Adaypp si7eez ubbita taanii yinttis odeez gishos yinttan dosintteezita geeza.

¹⁶ Taanii yinttan doreezaypp attin yi tana doorekkaya. Yi yhanigii dhaboowa aafe aafod garkk taanii yinttan shuumeeza. Yeezako ta Aday yi ta sunthar woosseezibaz ubba yinttis immada.

¹⁷ Ta kiitay yhaya: woli woli qadhdhoytta.

Yesuusa alamay E tamaaritana ixrodana odeeza

¹⁸ «Alamay yinttan ixxiko tiinattii tana ixxeeza eroytta.

¹⁹ Yi alame baz maaqqeezako alamay fabaz garkk yinttan qadhdhoda. Zin taanii yinttan alamepp shagii dooreez gishonnee yi alame baz baa gishos alamay yinttan ixxiza.

²⁰ «Aylle fa godaypp aadhooya» gi taanii yinttis odeezana qoppoytta. Unttii tana bayi7eez baz maaqqiko yinttanakka bayi7oda. Unttii ta qaala naageezbaz maaqqiko yi qaalakka naagoda.

²¹ Zin unttii tana azazeezana eroowa gishos yha ubba ta baggar yinttal afa oothoda.

²² Taanii yi7ii odekkabaz maaqqeezako unttisi nagara maaqqenna. Zin yhatti unttii oothiez nagarayis odod salambe baaya.

²³ Tana ixxizay ta Adakka ixxiza.

24 Oonkka oothekka ooso ta u gancce oothibe7ekkabaz maaqqeezako unttis nagara maaqqaam zin yhatti unttii taanii oothieza bi7ii tanakka ta Adakka ixxeeza.

25 Zin u higgayid, «Tana cer ixxeeza» ginttinttii xaafintteezay polinttod garkk yeyi haneeza.

26 «Adaypp yi7iz tuma beeziza Ayyana ta yinttis kiittoda. E yinttan minthathoda, tabaz markkottoda.

27 Yinttikka tiinapp aykkii taar yeza gishos tabaz markkottoda.

16

1 «Taanii yeya yi ammanay dhabaam garkk yinttis odeeza.

2 Uyinttan Ayihuditay Woosa Keethitaypp kessii dakkoda. Yey garkkekka, yinttan wodhiza oonkka Xoossii koyiz baz oothiza aaziza wode ye7oda.

3 Unttii yeya yinttal afa oothizay tana woy Ada eroowa gishshosi.

4 Zin unttii yeya yinttal afa oothiza wode hellodar taanii yinttis odeezana yi akaakod garkk taanii yinttis yhaya odeeza. Tiinatii taanii yhaya yinttis odekka gam7eezay ta yinttar yeza gishshosi.

Geesha Ayyana ooso

5 «Zin yhatti taanii tana kiitteezayiko yhanigiza; yinttapp oonkka, «Ana yhanigee?» gi tana oyicizay baaya.

6 Zin taanii yeya odeez gishos yi wozinay azzanor kumeeza.

7 Zin taanii yinttis turo odiza; taanii yhanigiko yinttis lo77o. Abis giiko, taanii yhanggaam

ixxiko minthathizay yinttiko ye7enna. Zin taanii yhanigii eza yinttiko dakkoda.

⁸ Minthathizay yi7ii, nagarabazinnee, xillotith bazinnee pirdda bagga yha alame as erisoda.

⁹ Nagarabaggay, asay tana ammanoowa gishshosii.

¹⁰ Xillotithibaggay, taanii Adayko yhanigiza gishonnee yi tana maaqqii bo7oowa gishshosi.

¹¹ Pirddabaggay, ma alame aqisizay pirddintteez gishshosii.

¹² «Taanii yinttis odiza gaame baz yeza, zin yhatti yinttis gelooya.

¹³ Tuma Ayyana yi7ii yinttan tumatithii ubbayko kaalithoda. E si7eez baz odizapp attin paapp ababazikka odooya. Ma tiinapp ye7odibaz yinttis E ododa.

¹⁴ E taasi yezaypp ekkii yinttis odiza gishos E tana bonchchoda.

¹⁵ Adayis yeza baz ubbitay tabaz; «Ayyanay taasi yezaypp ekkii yinttis ododa» taanii geezay yey gishosii.

Yi azzanay ufayisar laaminttoda

¹⁶ «Xiqa wodepp guye yi tana be7aamii; maakka xiqa wodepp guye yi tana be7ada» yeegeeza.

¹⁷ E tamaaritaypp pettay pettay woli gancce, «Xiqa wodeppi guye yi tana be7aamii; ma xiqa wodepp guye yi tana be7ada; maakka taanii Adayko yhanigiza guussay waaguusso?» yeegeeza.

¹⁸ «Xiqa wodepp guye waaguusso? E abi odintizako nuus erinttooya» yeegeeza.

19 Unttii fana oyicodayis koyizana Yesuusa erii, «Taanii, «Xiqqa wodeppi guye yi tana be7aamii; ma xiqqa wodepp guye yi tana be7ada» yeegeez gisho yi woli woli oyicinee?

20 Taanii yinttis turo odiza; yi yeekkodannee afuxoda, zin yha alamay ufayttoda. Yhatti yi azzanoda, zin yi azzanay ufayisa laaminttoda.

21 Wodeth asita na7a yelod hanodar fa yelo woday helleez gishos hirigiza. Zin na7a yelleezaypp guye na7a yha alamayil yelintteezay ufayssiza gishos fa meta iza dogiza.

22 Yey garkk, yinttikka yi wozinar azaniza, zin taanii yinttan maaqqii be7ada. Yi wozinay lo7ithii ufayttoda; ye ufayssa oonkka yinttapp ekkenna.

23 «Ye gallas yi tana ababazikka woosseenaa. Taanii yinttis turo odiza; yi ta sunthar woossiza baz ubba Aday yinttis immada.

24 Yhanno hellodayis ta sunthar ababazkka yi woossekkaya. Yi ufayssay folo maaqqad garkk Xoossa woossoytta; yi ekkoda.

25 «Taanii yhanno hellodayis yinttis aazisor odeeza, yhaypp taanii aazisor odoowa wode ye7oda. Zin Adayibagga taanii yinttis qoncissii ododa.

26 Ye gallas yi ta sunthar Ada woossoda; yi gishos taanii Ada woossaamii.

27 Abis giiko, Aday fa ubbas yinttan qadhdhiza. Yi tana qadhdhiza gishonnee taanii Aday lanqqepp ye7eezana yi ammaneez gishos E yinttan qaadhiza.

28 Taanii Aday lanqqepp yha alame ye7eeza; ma alame ashshii Adayko yhammada» yeegeeza.

²⁹ E tamaaritay maaqqii, «Yeezako, yhatti neenii qoncce odiza; aazisor abikka odooya.

³⁰ Neenii ubba baz erizana nuunii yhatti eriza; ma nena oonkka oyicod garkk neenii koy-ooya. Yeyi nuna neenii Xoossapp kiiintteez as maaqqeezay ammanthiza» yeegeeza.

³¹ Yeezin, Yesuusa mahii untiko, «Yhatti amaninnee?

³² Yeezako, yi, yi kara laalinttiz wodaynnee ta ubbas olii ashii qosinttiza woday ye7oda; yhattekka yi7ii helleeza. Zin Aday taar yeza gishos ta ta aadda baaya.

³³ Yi taar yeziko saro yinttis yezoday garkk taanii yeya odeeza. Alamel yezitar yi metint-toda. Zin miingoytta; taanii alama gameeza» yeegeeza.

17

Yesuusa woosa

¹ Yesuusa yeya odeezaypp guye pude salo bi7ii, yhay garkk yeegeeza: «Adayyo, saatay helleeza; ne Na7ay nena bonchchod garkk neenii ne Na7a bonchchoba.

² Neenii ezi inggeez ubbayis E medhinas de7o immadaygarkk as ubbayil afa ezisi mawute inggeeza.

³ Medhina de7o, nena, pettii tuma Xoossannee ne kiiintteez Yesuus Kiristtoosa ero.

⁴ Ne ta oothod garkk inggeez oosa polii nena sa7all bonchcheeza.

⁵ Yhattekka, Adayyo, alame medhinttodaypp tiina ne kale taas yez bonchchayir tana bonchchoba.

⁶ «Alame asaypp neenii taasi inggeezita nena eriseeza. Unttii neesita; neenii untan taas inggeeza. Unttii ne qaalayiskka kiittintteeza.

⁷ Neenii taasi inggeez ubba baz neepi ye7eezana untii yhatti eriza.

⁸ Neenii taasi inggeez qaala taanii untis inggeeza; untikka ye qaala ekkeeza. Taanii ne lanqqepp ye7eezay tuma maaqqizana erii neenii tana azazeezanakka ammaneeza.

⁹ «Taanii untis woossiza. U neesita maaqqeez gishos neenii taas inggeez asayis woossizaypp attin alamayis woossaamii.

¹⁰ Taas yeza ubbabazay nebaz; nees yez ubbitaykka tabaz. Taanii u baggar bonchchintteeza.

¹¹ Taanii yhaypp guye alamel yezaamii; untii alamel yeza. Taanii yhatti neeko yhanigiza. Geeshsh Adayyo, yha neenii taas inggeezitay neerannee taara petto maaqqeezaygarkk untii petto maaqqad garkk untan ne taas inggeez ne sunthayir naagoba.

¹² Taanii untar sa7all yezar, ne taas inggeez ne sunthay wolqqar untan naageeza. Geeshsha Maxaafay geezay polinttod garkk dhabodayis beeziza athaypp attin untapp hara oonkka dhabekkaya.

¹³ «Yhatti ta neeko yhanigiza. Ta ufayssay u wozina gancce folo maaqqad garkk yhaya taanii alamel yezar odiza.

¹⁴ Taanii untis ne qaala inggeeza. Taanii alamepp maaqqekkazay garkk, untikka alamepp maaqqekka gishos alame untan ixxeeza.

¹⁵ Neenii iitapp untan naagod garkkepp attin alamepp kessod garkk woossaamii.

¹⁶ Taanii alamepp maaqqekkazay garkk untikka alamepp baaya.

¹⁷ Neenii ne tumatithar untan nebaz oothoba; ne gaalaykka tuma.

¹⁸ Neenii tana alame kiitteezay garkk taankka untan alame azazeeza.

¹⁹ Ma untii tuma geeshsh maaqqad garkk taanii ta ubba u gishos tana ta geeshsh udiza.

²⁰ «Taanii u aaddas baazin untii qaala odin, tana ammanod asitayiskka woossiza.

²¹ Untii ubbitay petto maaqqad garkk taanii woossiza. Adayyo, ne taar yezay garkk, ma ta neer yezay garkk untii nuur yezod garkk woossiza. Ye wode neennee tannee azazeezana alamay ammanoda.

²² Neenne taanii petto maaqqeezay garkk, untii petto maaqqad garkk, neenii tana bonchcheezay garkk, taankka untan bonchcheeza.

²³ Taanii u gancce, neenii taar yezay garkk untii folo petto maaqqad garkk nena woossiza. Yeykka, ne tana kiitteezanannee ne tana qadhdheez qadhayir untan qadhdheezana alame erod garkke.

²⁴ «Adayyo, neenii taas inggeezitay taanii yeza aqo taar yezoday garkk koyiza. Alamay medhintodaypp tiina neenii tana qadhdheez gishos taas inggeez ta bonchcha untii be7ada.

²⁵ «Geeshshi Adayyo, alame nena erooya, zin taan nena eriza. Ma neenii tana azazeezana yhayttitay eriza.

²⁶ Neenii tana siiqeez siiqqay untar yezod garkk, ma taanii untar maaqqad garkk, taanii ne suntha untan eriseeza; tiinaskka erisoda» yeegeeza.

18

Yesuusa aykinttith

(Mat. 26:47-56; Mar. 14:43-50; Luq. 22:47-53)

¹ Yesuusa woosa wuuriisezayppi guye fa tamaritayir Qediroona loophpha piinggii, ye bessayid yez woyra gade gancce geleeza.

² Yesuusa gaame wode fa tamaritayir ezayid shiiqiza gishos Yesuusa aathii inggeez Yihuda ye aqat eriza.

³ Yeyi gishos, Yihuda paanoose, zhabbe, toorarannee gondallera aykkeez gaame wotaaddarita, qeese halaqitayinnee Ferisaawe asay kiitteez Xoossa Keethi naagiz poolisita kaalethi ekkii, ye aqo yhanigeeza.

⁴ Yesuusa fana hellod haniza baz ubba erii, gaxa kezii, «Oona koyee?» yeegeeza.

⁵ Unttii mahii, «Naazirete Yesuusa koyiza» yeegeeza.

E mahii, «Tana» yeegeeza.

Yesuusa aathii inggeez Yihuda ezayid untar eqqeeza.

⁶ E, «Tana» geez wode unttii guye shiiqii, fok-keeza.

⁷ Yesuusa maakka, «Oona koyinnee?» yeegee oyceenza.

Unttii, «Naazirete Yesuusa koyiza» yeegeeza.

⁸ E mahii, «Tana maaqqizana yinttis odeeza. Yikkee, yi tana koyiz baz maaqqeeko yhayttita dakkoytta» yeegeeza.

⁹ E yeya geezay, «Adayyo, neenii taasi inggeez-itaypp hara attozin pettaka dhabisekka» geez qaalay polinttod garkke.

10 Simoon Phixiroosas fa mashsha yeza mashsha shoddii qeese halaqa ayllayis ushachchi haytto, qadhi oleeza. Ye ayllay sunthay Malkkoosa.

11 Yesuusa Phixiroosako, «Ne mashsha shookayid mahoba. Ta Aday taasi inggeez xuu7aypp ta uzhaama neesi aazinee?» yeegeeza.

Yesuusa qeesitay tiina shiiqeeza

(Mat. 26:57-58; Mar. 14:53-54; Luq. 22:54)

12 Ayihude wotaaddaritayir u halaqay Xoossa Keethi naagiz poolisitayira wolla Yesuusa aykkii acceeza.

13 Tiina Yesuusana Haannako kanggeeza. Haanna ye laythi qeese halaqa maaqqiz Qayyaafa bolle.

14 Qayyaafa, «Asii woya gishos pettii asii yhayqqiko lo77o» gi tiina Ayihuditana zoreezaya.

Phixiroosa Yesuusana kaddeeza

(Mat. 26:69-70; Mar. 14:66-68; Luq. 22:55-57)

15 Simoon Phixiroosannee hara pettii tamaray Yesuusa kaallii qitteeza. Qeese halaqay ye yhankko tamaara lo7ithii eriza. Yeyi gishos, E Yesusar qeese halaqay zabba geleeza.

16 Zin Phixiroosa baler gase pengel eqqeeza. Qeese halaqay eriza hara tamaray bale kezii, penge naagiza asttis odin, Phixiroosa gelisseeza.

17 Penge naagiz asita Phixiroosako, «Neenii, ye athay tamaritaypp petta baasa?» yeegeeza.

Phixiroosa mahii, «Wa77a, tana baaya» yeegeeza.

18 Sa7ay meeggiza gishos ayllitayirannee naagizitay xiife tama eethii, marii eqqii kashiza. Pheixiroosakka untar eqqii tama kashiza.

Qeese halaqay Yesuusana oyiceeza

(Mat. 26:59-66; Mar. 14:55-64; Luq. 22:66-71)

¹⁹ Qeese halaqay Yesuusa, e tamaaritay baggan-nee e timirttay bagga oyceenza.

²⁰ Yesuusa mahii, «Taanii asi ubbas geesha odeeza. Taanii Ayihude ubbitay shiiqiza Ayihuditay Woosa Keetha giddonnee Xoossa Keetha ubba wode taamarsseeza. Geema abikka odekkaya.

²¹ Yeezin, neenii tana abis oyicce? Ta ododar si7eez asa oyccoba. Ye asay taanii odeezana eriza» yeegeenza.

²² Yesuusa yeya geez wode ye bessayid eqqeez wotaaddaritaypp pettay Yesuusa baqqii, «Qeese halaqayis yhay garkk yeegii mahinnee?» yeegeenza.

²³ Yesuusa mahii, «Taanii iitta baz odintteez maaqqiko markka ko7oba. Zin taanii turo odintteez maaqqiko tana abis baqqee?» yeegeenza.

²⁴ Yeyi gishos, Haanna, Yesuusa aciniteezan garkk qeese halaqa Qayyaafako dakkeenza.

Phixiroosa Yesuusana kaddeenza

(Mat. 26:71-75; Mar. 14:69-72; Luq. 22:58-62)

²⁵ Phixiroosa ezayid eqqii, tama kazhodar, atteez asay eziko, «Neenii yha athay tamaaritaypp petta baasa?» yeegeenza.

Phixiroosa mahii, «Wa77a, taanii e tamaare baaya» yeegii kaddeenza.

²⁶ Qeese halaqay ayllitayippe pettay, Phixiroosa haya gacheez athay dabbay, Phixiroosako, «Taanii nena ezar atakilittay gancce be7ekkasane?» yeegii oyceenza.

²⁷ Phixiroosa maakka kaddeenza. E yeya geezan garkk shugula uukkeenza.

Yesuusa Philaaxoosa tiina
(*Mat. 27:1-2, 11-14; Wan. 13:38; Mar. 15:1-5; Luq. 23:1-5*)

²⁸ Wontta guura, untii Yesuusana Qayyaafa karapp gade aqisizay ooso keetha kanggeeza. Ayihuditay Paaziqa Baale katha maadayis fana tunisaamay garkk gade aqisizay ooso keetha gelekka.

²⁹ Yeyi gishos, Philaaxoosa untiko bale kezii, «Yha atha abis mootee?» yeegeeza.

³⁰ Untii, «E iita oothekkabaz maaqqeezako nuunii eza neeko ke7aamii» yeegeeza.

³¹ Philaaxoosa mahii, «Yi eza ekkii kanggii, yi higgay gizay garkk ezal afa pirddoytta» yeegeeza.

Ayihuditay, «Oonakka wodhiza mawute nuus baaya» yeegeeza;

³² Yeyi haneezay Yesuusa abigarkk yhayiqo yhayqqodazako erisodayis odeez qaalay polintto-dayisii.

³³ Philaaxoosa fa ooso keetha maaqqii gelii, Yesuusa xeezii, «Neenii Ayihude kaato?» yeezii oyceeza.

³⁴ Yesuusa Philaaxoosako, «Yha oyicha neenii neepp oyicinennee woy hara asii nees tabaz odeennee?» yeegeeza.

³⁵ Philaaxoosa mahii, «Ta Ayihude aso? Ne asayira qeese halaqitay nena taasi aathii inggeeza. Ne abi ootheennee?» yeegeeza.

³⁶ Yesuusa, «Ta kaatetithay yha alamayid baaya. E yhaydda maaqqeezako ta Ayihuditay halaqitayis aadhii ingginttod garkk ta ayllitay taasi olintto. Zin ta kaatetithay yha alamayid baaya» yeegeeza.

³⁷ Yeyi gishos, Philaaxoosa Yesuusako, «Yeezin, neenii kaatonnee?» yeegeeza.

Yesuusa mahii, «Tuma ta kaate maaqqizana ne geeza. Taanii yelintteezaynnee yha alame ye7eezay tumatithis markkattodayis. Tuma bagga maaqqeez oonkka taanii giza si7iza» yeegeeza.

³⁸ Philaaxoosa, «Tuma aba bazo?» yeegeeza.

Philaaxoosa yeya geezaypp guye Ayihuditayiko bale kezii, «Taanii eebb aba iitakka denggekkaya.

³⁹ Zin Paaziqa Baale gallas, pettii asii yinttis achchapp bili7iz woga yeza. Taanii yinttis Ayihuditay kaata billod garkk koyinnee?» yeegeeza.

⁴⁰ Unttii mahii, fa qaala dhoqi udii, «Baribaana billobapp attin eza baaya» yeegeeza. Zin Baribaana paanno.

19

Yesuusa sottinttodaygarkke pirddeeza.

(Mat. 27:27-32; Mar. 15:15-21)

¹ Yeypp guye, Philaaxoosa Yesuusana garafiseeza.

² Wotaaddaritay anggunthi zawude medhdhii e ommayil gaddeeza. Ma zoqo afile eza ma7iseeza.

³ Eziko shiiqii, «Ayihude kaatayyo, medhinas kawutoba» yeegeeza eza baqqeeza.

⁴ Philaaxoosa maakka bale kezii, Ayihuditayiko, «Yeezako, taanii eebb aba iitakka denggekaaza yi erod garkk eza yinttiko bale kessoda» yeegeeza.

⁵ Yeypp guye, Yesuusa anggunthi zawude fa ommal gaddii, zoqo afile ma77ii, bale kezeza. Philaaxoosa Ayihuditayiko, «Atha yhaya bo7oytta» yeegeeza.

⁶ Qeese halaqitayinnee Xoossa Keethi naag-izitay eza be7eez wode fa qaala dhoqi uddii, «Mazqalel afa sottoba! sottoba!» yeegeeza.

Philaaxoosa untiko, «Yi eza kanggii, mazqalel afa sottoytta. Taanii epp aba iitakka denggekkaya» yeegeeza.

⁷ Ayihuditay mahii, «Nuus higgay yeza. E fana Xooss na7a ootheetz gishos nu higgay garkk E yhayqqodayis beeziza» yeegeeza.

⁸ Philaaxoosa yeya si7eez wode tiinaasaypp iita yashitteeza.

⁹ Maakka Philaaxoosa fa ooso keethi maaqqii gelii Yesuusako, «Neenii anapp ye7eennee?» yeegii oyceeza. Zin Yesuusa ezisi abikka mahekkaya.

¹⁰ Yeyi gishos, Philaaxoosa, «Taas odoosa? Nena billodayis woy mazqalel afa sottodayis taasi mawute yezana eroosa?» yeegeeza.

¹¹ Yesuusa, «Xoossay nees silixannee inggekkabaz maaqqeezako taal afa silixxaanee nees baabonazin. Yeyi gishos, tana nees aathii inggeezay aadhiz nagara ootheetza» yeegeeza.

(Mat. 27:15-31; Mar. 15:6-20; Luq. 23:13-25)

¹² Philaaxoosa yeya si7eez wode Yesuusa billodayis oge koyeeza. Zin Ayihuditay fa qaala dhoqi uddii, «Neenii eza billizbaz maaqqiko Kaat-tay Qeesare bagga baaya. Fana kaate giz oonkka Qeesaares morkke» yeegeeza.

¹³ Philaaxoosa yeya si7ii Yesuusa bale kesseeza. Yeezii, «Lochche Shuchchi» yeegiz bees pirdde oy-del betteeza. Ibraysxe qaalayir ye aqay «Gebeta» guussii.

¹⁴ Ye gallasay Paaziqa Baale bonchchodayis giigintto gallas. Ye wode sa7a usuppun saate heera. Philaaxoosa Ayihuditayiko, «Yi kaata yhaya bo7oytta» yeegeeza.

¹⁵ Ayihuditay fa qaala dhoqi udii, «Dhabisoba! Dhabisoba! Mazqalel afa sottoba» yeegeeza.

Philaaxoosa mahii, «Yi kaata taanii mazqalel afa sottodayis koyinee?» yeegii oyceeza.

Qeese halaqitay, «Qeesarepp hara kaati nuus baaya» yeegeeza.

¹⁶ Yeypp guye, untii Yesuusa mazqalel afa sottod garkk Philaaxoosa untis aathii inggeeza.

Untii Yesuusa aykkii kanggeeza.

Yesuusa sotintta

(Mat. 27:32-44; Mar. 15:21-32; Luq. 23:26-43)

¹⁷ Yesuusa fa mazqala tookkii, «Omma ota» giz aqo yhanigeeza. «Omma ota» guussay Ibrayisxe qaalayir «Golgota» guusii.

¹⁸ Untii ye aqayid mazqalel afa Yesuusa sotteza. Ma ezar hara nam7i asita, petta gede baggar yhankka yhana baggar mazqalel afa sotteza.

¹⁹ Philaaxoosa, «Ayihuditay Kaati, Naazirete Yesuusa» yeegizi xuufe xaaffii mazqalel afa gaddeeza.

²⁰ Yesuusa mazqalel afa sotintteez aqay katas kale yez gishos gaame Ayihuditay ye xuufa nabbabeeza. Xuufay xaafintteezay Ibrayisxe doonar, Laatinee doonarannee Girike doonara.

²¹ Yeyi gishos, qeese halaqitay Philaaxoosako, «Yha athay fana Ayihude kaati yeegeeza» gi xaafobapp attin «Ayihude kaati» gi xaafippe» yeegeeza.

22 Yeezin, Philaaxoosa, «Ta xaafeezana xaafeeza» yeezii maheeza.

23 Wotaaddaritay mazqalel afa eza sotteezaypp guye e afila ekkii, oyddii aqo wolla qoo7inttii, petto petto ekkeeza. E afar olii ma77iza adusse afila ekkeeza.

24 Wotaaddaritay, «Oona hellodazako, ixxa olo-daypp attin afila per7aamii» yeegeeza. Yeyi haneezay geeshsha Maxaafayid, «Ta afila shaakkii ekkeeza;

ta adusse afila gujjikka ixxa oleeza» ginttinttizay polinttodgarkke. Yeyi gishos, wotaadderitay yeya ootheeza.

25 Zin Yesuusa mazqale kale e indat, e indat mishshiti, Qeliyooophe machchat Mayiramira Magdeela Mayrama eqqeeza.

26 Yesuusa fa indatinnee E qaadhiza tamaray ezayid eqqeezita bi7ii, fa indatiko, «Ta indatee, ne na7a yhaya bo7oba» yeegeeza.

27 Yeypp guye, ye tamarayiko, «Ne inidat yhanno bo7oba» yeegeeza. Ye tamaray izo ye wodepp aykkii fa kara kanggeeza.

Yesuusa yhayqqeeza

(Mat. 27:45-56; Mar. 15:33-41; Luq. 23:44-49)

28 Yeypp guye, Yesuusa ubbay yhatti polintteezana erii, geeshsha Maxaafayid xaafintteezay polinttod garkk «Tana saamiza» yeegeeza.

29 Ye aqayid pettii xugga kunithi caala woyne yeza. Unttii zanza ye woynayid olii, hisophe mithii xeeral gaddii, Yesuusa doonayiko shiisheeza.

30 Yesuusa woyna ganxxii bi7ii, «Polintteeza» yeegeeza.

Yeypp guye, fa morga ziqqi udii fa shemppa inggeeza.

Yesuusa miyya toorar caddeeza

³¹ Ye gallas giigintto gallas maaqqiz gishonnee wonttitha gallasay bonchcho maala maaqqiz gishos asay ahay mazqalel afa maala gallas peezhaamgarkk untan toka menithii, mazqalaypp wodhisoday garkk Ayihuditay Philaaxoosa woosseeza.

³² Yeyi gishos, wotaaddaritay yhanigii, Yesuusar sotintteez nam7i asay toka mentheeza.

³³ Zin Yesuusako ye7eez wode E yhayqqeeza bi7ii, e toka menthekkaya.

³⁴ Zin wotaaddaritaypp pettay Ea miyya toorar caddin elle suuthinnee haathii goggeeza.

³⁵ Yi ammanod garkk yeya be7eezay markkatteeza. E markkatithaykka tuma. Ma yeypp E oosa odizay tuma maaqqeeza eriza.

³⁶ Yeyi haneezay geeshsha Maxaafay, «E megethitaypp pettii bazikka meqqenna» geezay polinttod garkke.

³⁷ Maakka geeshsha Maxaafay hara aqa, «Untikka fa caddeezana be7ada» yeegeeza.

Yesuusa moogintteeza

(Mat. 27:57-61; Mar. 15:42-47; Luq. 23:50-56)

³⁸ Yeypp guye, Armataasa gizi katamapp ye7eez Yooseefa Yesuusa aha ekkodayis Philaaxoosa woosseeza. Yooseefa Ayihuditayis yashitteez gishos qosor Yesuusa kaalliza.

Philaaxoosa, «Ekkoba» yeegeeza. Yeyi gishos, Yooseefa shiiqii Yesuusa aha ekkeeza.

³⁹ Ma yeypp Niqodimoosa, yhaypp tiin Yesuusako qamma ye7eezay, karbbennee godare uuthara walakintteez pettii kilo giraame maaqqiz shitto ekkii Yooseefar wolla ye7eeza.

⁴⁰ Ye nam77ii asitay Yesuus aha ekkii, Ayihuditay aha ziidhith wogar, shittora, moogo afilar sawaxeeza.

⁴¹ Yesuusa sotintteez aqay atakiltte gade. Ye atakiltte gancce shuchchip woocintti giigeez tiina oonkka mooginttekka oroth duufay yeza.

⁴² Ye duufay lanqqe yez gishonnee Ayihuditay maalas giiginttiza gallas maaqqeez gishos Yesuusa aha moogeeza.

20

Yesuusa yhayiqopp denddeeza

(Mat. 28:1-8; Mar. 16:1-8; Luq. 24:1-12)

¹ Ya Saaminttatis tiina gallas sa7a geezhekkazin, Magdeela Mayrama, Yesuusa moogintteez duufayiko yhanigii shuchchay ye duufay doonaypp hali7eezana be7eeza.

² Simoon Phixiroosakonnee Yesuusa qadhdhiza yhankko tamarayiko woxxii yhanigii, «Duufaypp Goda ekkii dhabeeza; eza aba gaddeezako nu erooya» yeegeeza.

³ Yeyi gishos, Phixiroosannee yhankko tamaray kezii duufo yhanigeeza.

⁴ Nam7itaykka wolla woxxeeza; zin yhankko tamaray Phixiroosapp aadhii tiinattii duufo helleeza.

⁵ Ye tamaray zuggii, moogo afila be7eeza, zin duufo gancce wodhdhekaya.

⁶ Simoon Phixiroosa eza kaallii yi7ii, duufo wod-hdhii moogo afiley ezayid yezana be7eeza.

⁷ Ma Yesuusa ommas xaaxintteez afiley dakinthinttii duma pettii aqo yezana be7eeza. Ye afiley duma yezaypp attin moogo afileyir wolla baaya.

⁸ Ye wode tiinattii duufo helleez yhankko tamaray gelii bi7ii ammaneeza.

⁹ Yesuusa yhayiqopp dendo beezizana odiza geeshsha maxxafe qaala untii haga akaakekaya.

¹⁰ Yeypp guye, e tamaritay fa kara maaqqii yhanigeeza.

*Yesuusa Magdeela Mayramis bentteeza
(Mat. 28:9-10; Mar. 16:9-11)*

¹¹ Zin Mayrama ye duufay doonayid eqqii yeekkittar zuggii duufay gancce be7eeza.

¹² Boothi afila ma77eez nam77ii kiitanchchitay Yesuusa ahay woyi7eez aqayid pettay omma achchara yhankkay toke achchara betteezita be7eeza.

¹³ Untii iiko, «Yhan astte, abis yeekkee?» yeegii oyiceeza.

Iza, «Untii ta Goda ekkii dhabeeza; untii aba gaddeezako taanii erooya» yeegeeza.

¹⁴ Yeya geezaypp guye, izakka guye maaqqii be7adar Yesuusa ezayid eqqeezana be7eeza. Zin E Yesuusa maaqqeezana erekkaya.

¹⁵ Yesuusa iziko, «Yhan astte, abis yeekkee? Oona koyee?» yeegii oyiceeza.

Mayrama atakilte naagiza asii aazin, «Godayyo, ne ekkeezibaz maaqqiko, eza aba gaddeezako taasi odooye. Taanii eza ekkoda» yeegeeza.

¹⁶ Yesuusa iziko, «Mayrame» yeegeeza.

Iza eziko mahii, Ibraysxe doonar «Rebuunii» yeegeeza. Yeyis birshshithay «Asitamaarayyo» gu-usii.

¹⁷ Yesuusa iziko, «Taanii haga ta Adayko yhanigekka gishos tana aykkii ashshodayis koyppe. Zin ta ishitayko yhanigii, «Taanii ta Adayikora yi Adayiko, ta Xoossayikora yi Xoossayiko, yhammada geeza» gi untisi odoba» yeegeeza.

¹⁸ Magdeela Mayrama Goda be7eezanannee izis yeya E odeezana yhanigii e tamaritayis odeeza.

Yesuusa fa tamaritayis bentteeza

(Mat. 28:16-20; Mar. 16:14-18; Luq. 24:36-49)

¹⁹ Saaminttaypp tiina gallas omarsse, e tamaritay Ayihuditayis yashittii ibithi gorddii shiiqqii betteezin, Yesuusa yi7ii, u gancce eqqii, «Saro yinttis maaqqo» yeegeeza.

²⁰ Yeya gi maaqqii fa kushannee fa miya untan beezeeza. E tamaritay Goda bi7ii gaame ufayteeza.

²¹ Yesuusa mahii untiko, «Saro yinttis maaqqo; ta Aday tana kiitteezaygarkk taankka yinttan kiitiza» yeegeeza.

²² Yeya geezaypp guye, untal afa ufi gi puggeeza. Ma, «geeshsha Ayyana ekkoytta.

²³ Yinttii atto geez asay nagaray atto giintint-toda. Yi atto geekkazittayis nagaray atto giintint-taamii» yeegeeza.

Yesuusara Toomaasa

²⁴ Zin taphpho nam77ii tamaritaypp pettay, Didimoosa giintinttiz Toomaasa, Yesuusa ye7eez wode untar baaya.

²⁵ Yeyi gishos, yhankko e tamaaritay Toomaasakko, «Nuunii Goda be7eeza» yeegeeza.

Zin Toomaasa untiko, «Misimarer E cadintteez e kushayid yez beeta be7ekkazar ye beeta ta biradhdher bochchekazar, ma ta kusha e miyayid dakkii be7ekkazar ammanaamii» yeegeeza.

²⁶ Saaminttapp guye, Yesuusa tamaaritay maakka kara shiiqii betteeza; Toomaasakka untar yeza. Ibithii gorddinttii yeezin Yesuusa yi7ii, u gancce eqqii, «Saro yinttis maaqqo» yeegeeza.

²⁷ Yeypp guye, Yesuusa Toomaasako, «Ta kusha ne biradhdher bochchii bo7oba. Ma ne kusha ta miyayid dakkii bo7oba; sidhippe, ammanoba» yeegeeza.

²⁸ Toomaasa mahii, «Ta Godayyo, ta Xoossayo» yeegeeza.

²⁹ Yeezin Yesuusa, «Neenii tana be7eez gishos ammaneeza, zin tana be7ekkazar ammaneezita anjjintteezita» yeegeeza.

Yha maxaafay qofa

³⁰ Yesuusa yha maxaafay gancce xaafintteez baz hara gaame malita fa tamaaritay tiina ootheeza.

³¹ Zin Yesuusa E Kiristtoosa, Xoossa Na7a maaqqizana yi ammanod garkk ammanii e sunthayir de7o demmaday garkk yhayi xaafintteeza.

21

Yesuusa laappun fa tamaaritayis bentteeza

¹ Yeypp guye, Yesuusa Xibaaroosa Abba kale fa tamaaritayis maaqqii bentteeza. E untis yhaypp kaallii yez hanor bentteeza.

² Simoon Phixiroosa, Didimoosa ginttinttiz Toomaasa, Qaana Galilap ye7eez Naatina7eela, Zabidoosa na7itayinnee Yesuusa tamaaritaypp hara nam7itay wolla yeza.

³ Simoon Phixiroosa untiko, «Taanii molo aykkodayis yhanigiza» yeegeeza.

Unttii, «Nuukka neer yhammada» yeegii, wogolo gancce geleeza. Zin unttii ye qamma aba molokka aykkekkaya.

⁴ Wontta guura xalqqe dolodayipp tiina, Yesuusa abba gaxa eqqeeza, zin e tamaaritay Yesuusa maaqqeezana erbe7ekkkaya.

⁵ Yesuusa untiko, «Ta laggitayyo, molo aykkekasa?» yeegeeza.

Unttii mahii, «Akkokka aykkekkaya» yeegeeza.

⁶ E mahii, «Yi gita wogolaypp ushachchi baggar oloytta; yi molo aykkoda» yeegeeza. Yeyi gishos, unttii gita ushachchi baggar oleeza. Molay gaanggeez gishos goochchii kessodayis gammintteeza.

⁷ Yesuusa qaadhiza tamaray Phixiroosako, «Yhayi Goda bayi!» yeegeeza. Simoon Phixiroosa E geezana si7ii kallo yez gishos fa afile ma77ii abba giddo guppil gelleza.

⁸ Zin wogolo giddo atteez yhankko tamaritay molo kumeez gita goochchii, abbapi gaxa kezeza. U abbapi nam77ii xeet yhadhay garkk haakkiza zini.

⁹ Unttii abbapp gaxa kezeez wode xiife qaaqar molo yezannee soollo be7eeza.

¹⁰ Yesuusa untiko, «Yhatti yi aykkeez molaypp xiqqa yhana inggoytta» yeegeeza.

11 Simoon Phixiroosa wogolite gelii, xeeti ishatammannee hayidzii dammo molitay kumeez gita goochchii abbapp gaxa kessezza. Molay yey garkk gaame maaqqikonnee gitay feedhdhinttekkaya.

12 Yesuusa untiko, «Yhana yi7ii moytta» yeegeeza. E Goda maaqqeezana untii ereez gishos e tamaritaypp pettayika, «Neenii oonoo?» gi eza oyicodayis yibatteezay baaya. E Goda maaqqeezana ubbitay ereeza

13 Yesuusa yi7ii, soollo ekkii untisi inggeeza; molakka yhay garkk inggeeza.

14 Yesuusa yhayiqopp denddii fa tamaritayis benttadar yhayi hayidzantho.

Yesuusarannee Phixiroosara

15 U meezaypp guye, Yesuusa Simoon Phixiroosako, «Yoona na7a Simoona, tana yhayttitaypp aathii qadhinnee?» yeegeeza.

Simoon Phixiroosa, «Ee Godayyo, taanii nena qadhdhizana ne eriza» yeegeeza.

Yesuusa eziko, «Ta dur na7unthan heenggoba» yeegeeza.

16 Yesuusa nam7antho, «Yoona na7a Simoona, tana qadhdhinee?» yeegeeza.

Simoon Phixiroosa, «Ee Godayyo, taanii nena qadhdhizana ne eriza» yeegeeza.

Yesuusa, «Ta hooggita heenggoba» yeegeeza.

17 Yesuusa hayidzantho, «Yoona na7ayyo Simoona, tana qadhdhinee?» yeegeeza.

Yesuusa hayidzantho Simoon Phixiroosako, «Tana qadhdhinee?» yeegii oycceez gishos Phixiroosa azzanii, «Godayyo, neenii ubba baz

eriza; taanii nena qadhdhizana ne eriza» yeegeeza.

Yesuusa, «Ta durita heenggoba.

¹⁸ Taanii nees turo odiza; neenii na7atithar yez wode ne aaddas dancinttii, ne kozheez bessi yhanigiza. Zin ne cimeez wode ne kusha miccii beezoda. Haray dancsisoda; ne aqo bessi kangoda» yeegeeza.

¹⁹ Yesuusa yeya Phixiroosa ab garkk yhayiqo yhayqqii, Xoossa bonchchisodazikko erisodayis geeza. Yeya geezaypp guye, Yesuusa Phixiroosako, «Tana kaalloba» yeegeeza.

Yesuusarannee yhankko tamaara

²⁰ Phixiroosa guye maaqqii, Yesuusa qaadhiza tamaray faapi guyer yi7izana be7eeza. Ye tamaray, kaho miiz aqo Yesuusako shiiqii, «Godayyo, nena aathii immaday oonoo?» geezana.

²¹ Phixiroosa ye tamaara bi7ii, «Godayyo, yha athay ma wayadee?» yeegii Yesuusa oyceeza.

²² Yesuusa eziko, «Taanii ye7oda hellodayis E shemppor yezod garkk taanii koyko, yeyi nena abi metenee? Neenii tana kaalloba» yeegeeza.

²³ Yeyi gishos, ye tamaray yhayqqaam giz oday e ishita ubbita helleeza. Zin Yesuusa, «Taanii ye7od gatho, E yezod garkk taanii koyko nena abi metenee?» yegeeaypp attin «Yhayqqenna» geekkaya.

²⁴ Yha oday bagga markkatteyayne yhaya xaafeezay ye tamaara. E markkatithay tuma maaqqizana nuunii eriza.

²⁵ Yesuusa oothiez hara gaame baz yeza. Ta qoppin, ubba baz ommar ommar xaafintteezako,

xaafinttiza maxaafitayis kunithi alamay
gidodibaz aazooya.

Oroth Caago **Melo New Testament Latin Version**

copyright © The Word for the World International

Language: (Melo)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

95113415-a3bd-5069-be47-fe8016d2f076